



武進湯緯堂著

炙硯瑣談

亦有生齋開雕

炙硯瑣談序

同里趙懷玉謨

吾友湯君緯堂少有奇氣未冠卽以詩文名凡圍碁握槩六箸二筦絲竹曲解之屬世競慕尙以爲非是不能諧于時者君悉泊然無所好友朋過從之外仰屋著書雖歷宰繁劇案牘雜陳未嘗一日輟業晚官海外無書可觀省記所及纂炙硯瑣談十二卷補遺一卷攷鏡是非揚挖風雅人有一辭之善輒采錄之發潛闡幽非徒鈴說已也乾隆五十一年冬賊起臺灣鳳山失守君仗節死事越二日賊舉縣治卷籍將雜燒之時君所親王

子承松避難縣民吳世芳家以賊於居民不甚疑忌屬世芳竊取付君門生吳克達匿去及鳳山再陷克達全家它避賊始取爲然火之筮蓋閩中造筮多擘紙纏竹傳之以膏使易然也事平克達歸檢之厘存第十卷其補遺一卷則君生時乞華亭徐祚永點定故免于燹王子旣攜歸示予復從里中得初集橐數帙參閱之刪其複沓釐爲三卷念卷帙太簡若令孤行恐仍湮沒欲附歙縣鮑君以文知不足齋叢書以傳會其家多故遲之兩年未及付梓辛亥冬以文以其中尙可汰減復寄橐商定未浹旬而以文家失火所藏梨棗半付六丁是書

厘厘獲免可謂幸矣烏虜古者文章忠義咸本志性自末俗工于藻績岐立身而二之遂有才華素聞臨難苟免者後世愛其才未嘗不嫉其行至于貞臣烈士詞翰所貽一鱗片羽無賢愚竝知依惜則秉彝之好固未全爍于穹壤閒也況大節彪炳近在吾鄙平生誤述幸而出自餘燼再免于祝融回祿之災此冥冥中實有呵護存之者不俾永其傳非後死之責乎因卒開雕以竟前願諸人存書之功有不可泯故并著顛末以諗君之子孫乾隆五十七年春三月

江寧劉文

奎 鈐字

亦有生齋

此處有若干行非常模糊的刻字，內容難以辨認。

余弱不好弄凡技藝之屬一無所能閒或寄情於詩酒
暇則與二三朋好清談而已比來簿書鹿鹿遂廢詩夏
秋之交病肺咯血遂止酒又氣怯禁勿敢談嗚呼生人
之趣索然殆盡矣雖然必不得已而去去酒又必不得
已而去去詩談則烏可已也不可已而已譬諸相如揚
雄之吃仲長子光之瘖周昌鄧艾之期期艾艾不能舌
之庶幾筆之以期快吾胷臆而後可顧自愧眇見寡聞
既無可撰述卽生平見聞亦遺忘不知凡幾偶一省記
付諸盧奴恐不足當大方家一呷也二三朋好姑妄聽
之以爲酒人滑稽也可以爲詩腸鼓吹也亦可庚子冬

聞

予祭葬

賜卹有加給雲騎尉世職湯君字曾輅一字緯堂先世自吳門遷於常遂世爲武進人父諱自銘母董夢吳郡都元敬儒衣負笈入門而君生少工詩嘗詠鴉有飛近馬頭晴雪處立殘牛背夕陽時之句爲人所稱弱冠補博士弟子員貧而好學壬午入北雍舉順天試癸未成進士乙酉挑發河南以知縣用歷署濬獲嘉商邱補柘城己丑丁母憂歸服闋籤掣連江以父老改近授德清知縣丙申父憂歸里己亥補連江癸卯調鳳山鳳山在

臺灣郡南民番雜處其地多商官斯土者或夤緣爲利藪君之調臺也於甘肅差次部議格之及君歸而大府已再請得

俞旨君乃以一子渡海旣至一切御以寬簡暇則惟詩酒自娛然不名一錢爲令十餘年獨君最貧旣調臺矣而貧益甚故事臺缺三年卽更番還內地候遷丙午秩滿代者未至是冬賊烽熾命其子西渡曰城亾與亾令職也汝未仕可歸奉母其子不忍去遂糾鄉勇爲守禦計十二月壬子賊至君與參將瑚圖禮禦之手刃賊四人賊稍退參將者逐賊南去君回署集鄉勇民壯且賚

且諭將激以擊賊而賊復集邑故無城遂突入縣署左右皆潰走縣尉史君謙欲自刎君挽其手曰死誠善何不殺賊死耶遂挺劍手擊數賊賊刃交下斲指三君瞋目罵不已中賊鎗而殞子荀業亦持刀格賊力竭與史尉同日被害丙辰賊去吏民入殮置柩堂皇明年三月賊再陷鳳山署遂燬柩亦失所在未幾大軍平臺灣中丞徐公懸賞格購君遺骸不可得五十三年春君妻姪王伯蒼得君父子骸骨於餘燼瓦礫中乃得以骨歸葬嗚呼君文臣亦詩人也詩人以科第得官而終不能拔貧且以身殉豈詩者自古能窮人然君窮於一時之變

而通於千古之節君固可以無憾獨是文臣與城存亡死而已耳君身無縛雞之力而手刃賊者四賊逼復能握劍殺賊唾罵喫血至死而彌厲抑何勇也猶憶癸巳甲午間君候銓京師與程君景傳蔣君熊昌及余舉觴詠之會殆無虛日君簡於酬應獨至酒場詩壘則精悍之色見於眉閒今程罷宣城學博歸里蔣亦罷潁州守養母里中往時知好散若晨星而君竟以節烈昭於天壤余追維舊雨旣慨且感亦循髮而髣髴盡白矣君之大節表表其平日涖官政績必有本末可傳於後而執友垂盡君亦未嘗自言罕有識者是可慨也其治瘡遇

早誠能驅蝗邑人碑記其績治獲嘉漕政廉治商邱有律紋者湔雪貫罪其人後以行伍入仕版治柘城稍久去官日攀送者數里不絕至肩輿不能行至德清辨魚販之誣竊者狀所志止於此君之德止此也哉君生平絕無嗜好顧獨好詩曾錄其尤付劄氏而甲午後詩集攜至海外皆散佚所著炙硯瑣談十二卷補遺一卷勅于庚子成於乙巳凡六年而竣至丙午沒於賊今摺拾殘本而全書已不可得而見矣悲夫娶王氏子二荀業范業孫二貽汾貽浚詳行述不具書贊曰臺灣之役大吏奉

命甄核死事諸臣膺

卹典者惟彰化令俞竣同知長庚王雋及湯君而四耳雋暫攝篆竣臨事未及兩月長庚方由澎湖別駕遷任其久任臺灣以廉謹稱者惟湯君一人卒之抗節捐生仰邀優典足以光汗青及苗裔豈倖致歟惜君之所以治臺人缺有閒矣全臺需治孔亟使盡以湯君寬簡之治治之顧不足稱懷保而慶乂安哉

福建鳳山縣知縣贈雲騎尉世襲死節湯君墓志

洪亮吉撰

夫仁義豈有常蹈之者君子股肱既已竭加之以忠貞
是以苟息再死永符白圭之言臧洪復生無踰酸棗之
節則夫士君子肩一世之事出萬死之地者義重於生
乃如此乎若吾友湯君者殆其人焉君諱大奎字曾輅
一字緯堂世爲武進人父監生君自銘以學行顯於時
監生君夢明太常都穆入室而生君以是奇愛之君生
而廣穎大目明慧宿解八年而通尉律十五而明六經
時君與亮吉竝居中河橋側委巷中亮吉六七歲時君

年已逾弱冠補博士弟子員締交名流是正文字陋巷
專室之中有魁士奇人之跡自君始也未幾秉二親之
命爲四方之遊南眺禹穴北覲闕里傭書乎吳會佐幕
乎鄒魯飛蓬歎于微子負米同于仲由蓋十五年于此
云歲壬午年三十五始以國子監生舉順天鄉試明年
成進士又二年卽奉

命往河南以知縣用時二親在堂版輿迎養案牘之暇
極色養之致焉補柘城縣知縣遭內憂歸服闋補浙江
德清縣知縣又奉監生君憂君頻遭大喪有逾常禮廉
吏薄俸靡給乎饗飧先人敝廬或搖乎風雨始自中河

橋側遷于昇仙里右卽今之居第也服闋補福建連江
縣知縣四年調任鳳山鳳山懸于海中民番雜居風俗
不一又飴餠蜃蛤之產利徧天下筐篚篋篋之資富堪
數世用是前政率以賄敗君選于上官特膺此任檄調
之日攜一子兩僕赴焉至則掃除積習徐倣刁風三年
于茲俗安其治俟代未歸值臺灣民賊林爽文之變君
卽訓練鄉勇整飭吏民晉陽之內有壘而必增疎勒之
傍無城而亦守未幾聞彰化陷又未幾聞諸羅陷其時
莊大田亦據瑯瑤以應之壞雲四落海水亂飛怪獸奪
門驚禽布野君結纓禦寇握矢登門刃螳附之卒防豕

突之兵士氣乍揚賊鋒稍挫方復問傷弔死秣馬厲鋒
回聽事之堂行卻敵之賞而烏合三百踰毀垣而登朱
旗一軍鑿凶門而遁賊復蜂擁民同獸挺君知事不可
爲率典史史謙及愛子所親禦于堂皇前後手刃賊六
七人賊斲君三指復中數鎗而殞嗚呼楚司馬之背創
之者三晉中軍之指斲而非一抉伍員之目視烈日而
猶光斲杲卿之頭示衢人而皆哭至乃元黃蔽地愛子
隕于衝戈手足異門鄰童甘其白刃死義死孝茲爲烈
矣求仁得仁又何怨乎越四日吏民入殯君于署以史
君及君之子荀業列于左右平原之裔用國殤而在堂

秣陵之尉以鬼雄而列殯無何賊復陷鳳山署燬于火
逾月大兵定臺灣搜牢之舉已行列肆之民復返于是
巡撫徐公懸賞購君之尸不得今年二月君所親有復
至鳳山者掘堂皇下二尺得之史君及君之子遺骸亦
在焉恆幹旣摧而上衝之髮猶植燎原已熾而欲裂之
皆不腐遂復複衾三襲斂溫序之須元纁數重藏卞公
之爪聆伯奇之哭霜墮于中林聞杞婦之聲城崩于隔
海時有

旨別臺灣死事者平日居官優劣大府獨舉君廉謹以
聞于是有

旨賞給雲騎尉承襲又

恩給祭葬銀一百兩照陣亡例

賞卹銀一百兩千秋死節事白于彌年翁歸潔身賞隆于沒世于是報功之典彰焉激勸之旨寓焉君之孤范業暨孫貽汾始奉君之喪歸葬于某鄉之某原復累君行事乞志其幽禮也君生于雍正六年三月十一日死事以乾隆五十一年十二月十三日年五十有九君生平所著詩若干卷炙硯瑣談若干卷又補遺若干卷康樂成童先驚得句孝侯臨命尙復賦詩以至時歌易水感下泣之賓朋不讀河梁恥生降之都尉蓋性情之正

如此若夫炙硯瑣談之作又可言焉飛詞南國則不乏雕龍投分衡門則尙多竊鳥未嘗不驚其片言之善錄其一藝之長雜以舊聞將成信史振筆則仲宣七子悉入編摩餘篇則鄒衍九州將歸著述嗟乎不知者以爲海外瑰奇之著其知者卽以代襄陽耆舊之編乎今則成編數十半歸溟涬之宮奇字三千欲問豐隆之府於戲立言立功不朽者旣如斯矣百篇百卷所存者乃止此歟雖復終軍之亾南粵引重儒林季雅之沒射姑尤增文譽而傳家積軸未得比乎牛膏望海招魂并欲搜于魚腹天之阨君者不已甚乎此則化東周之血靡待

三年殺南海之青惟畱數簡摛材之彥不置辯于碧雞
樹檟之墳必飛濤于白馬於戲哀哉

皇清敕授文林郎福建鳳山縣知縣世襲雲騎尉湯君
墓表

乾隆五十一年冬臺灣民賊林爽文起彰化躡諸羅莊
大田據瑯瑤犄角以應其黨曾伯達等南陷鳳山鳳山
知縣湯君死之越三年己酉正月始克歸葬于武進龍
虎塘之原孤范業偕君壻莊宇達來請表其碣懷玉諾
之以病未果日月逾邁墓有宿草故人大節耿于心目
其敢以不文辭君之在鳳山也秩滿俟代屬賊執蔓延
縣故無城厓土垣三尺許君率僚佐募鄉勇日夜爲守
禦計一夕酌酒勞客君舉雅俗語爲儷句口占曰今日

不知明日事他生未卜此生休典史史謙訝其語不祥君曰人孰無死身既許國成敗聽之願諸君共相勉爾神色忼壯座客爲之罷酒平明賊果來攻與參將瑚圖禮禦之賊稍卻參將馳馬逐賊去君聞城北有警急馳歸得內應四人立斬以徇方獎厲兵役煮鬻糜飼眾賊已突進北門入縣治典史守獄死閩人王明素負膂力力屈亦死僕林坤手格之斲四指身斫數創暈絕仆地君則朝服坐聽事手劔擊賊賊刃交下猶瞋目詈不止時惟長子荀業從之官先以君詩文畀舅弟王崧令遠碎身蔽翼其父不去遂同遇害時十二月十三日也君

死賊旋散去故吏某等斂之置柩堂皇君居中典史左荀業右縣民吳世芳訪其元別葬龜山之麓官兵初復鳳山崧與世芳至葬處蹤跡僕有洪賜者識君繫髮綫形容亦約略可辨因併入棺明年三月鳳山再失縣治焚燬殆盡事平譌傳柩爲良民私葬巡撫懸賞購之不
得五十三年春值清明日崧與林坤酌酒舊所翻視瓦礫復得君父子骸骨於餘燼中更斂如制當是時臺灣南北守令丞倅相繼被戕至有爲賊踣頓困辱而後死死而功罪或不足以相揜者君歿之明年閩中大吏以縣有應解未解之帑檄封里中舊產旋奉

特旨給還又明年督撫上其居官死事狀
賜襲雲騎尉世職

予祭葬此固

聖天子綜核名實獎勵忠義亦君廉惠素著獲上有道
故能純終令聞視矯強倉卒徼倖于不朽之託者蓋未
可竝日語矣初君移殯臺灣郡城之南壇見夢林坤曰
滯此何爲過不速返坤瞿然覺乃謀歸故事沒于官者
旣抵里棺例入城君棺本輕過其家忽重執紼者喘汗
悚惕久而後行同里許承志君莫逆交也客臨清夢與
君讌飲酒半君忽高歌多軍中曲詞甚激楚許聞欲泣

君笑曰丈夫亦效兒女子態耶其靈爽之不泯如此君
諱大奎字曾輅一字緯堂中乾隆壬午舉人癸未進士
卒年五十九配王氏子二荀業國子監生范業孫二貽
汾襲職雲騎尉貽浚女二嫁莊宇達汪琰皆生員生平
攻詩文晚箸炙硯瑣談十二卷補遺一卷沒于賊懷玉
掇拾奇零釐爲三卷刻而行之其世次歷官與它行事
之可紀詳管侍郎幹珍所爲傳皆不書書其大節及得
自崧述與向之傳聞有异者揭諸墓乾隆五十五年夏
四月同里內閣中書舍人趙懷玉表

四月同生內閣中書令入徵謝王表
 自以放逐自之數日自具書謝
 多自餘清言詩酒無餘念
 對定香齋黃山二卷
 江右文淵各天海賦
 欲更知
 六
 日
 不

炙硯瑣談卷上

武進 湯大奎 曾輅

吾郡山水之美無如荆溪相距百里而近不獲一遊良

可歎息同邑楊青望昭守宐興萬瑱為之結伴游龍池作

倡和詩一卷余嘗序之為之神往癸巳夏余謁選入都

青望贈詩有何妨綠酒酬官俸但乞青山繞縣門之句

明年余隨牒德清繞郭青山宛然詩識也

楊青望弟旣庭棄儒習賈好作小詩嘗攜其卷示余為

題一絕云郢中白雪久飄零下里嘈嘈耳倦聽清氣得

來真不易亂鴉飛盡遠山青集中

荆溪萬秀才瑱為刻意苦吟多妙悟語余最愛其風色

聚寒鴉句即題其卷後云荆南詩老各天涯楚塞梁園

殢歲華謂史蒙溪汪玉田後起忽驚麟角異爭傳風色聚寒鴉

高青邱詩在路定畱經處咏還家猶著去時衣情致俱

勝國朝吳青霞啓元有句云憶舊那堪垂老別到家翻

誦贈行詩青出於藍而青於藍矣

王阮亭尚書名句多脫胎前人如吳山帶雨參差沒楚

火沿流次第生本儲光羲吳山遲海月楚火照江流又

高秋華岳三峯出曉日潼關四扇開本東坡三峯已過

天浮翠四扇行看日照扉又更愛風標兩公子水蒨花

外立移時本潘檉南宋人如許風標無用處年年分占水

蒨花其姑蘇懷古云山川終古迷商魯花木千年怨種

蠡春申澗上云青山終古連秦塢珠履何年問楚人調

法既同意境亦復相似蓋入吳集中一時作也

吉水李尚書維饒振裕著有白石山房詩余未之見友人

邵星臣摘其五言佳句如朔風吹大漠邊草動秋聲野

渡寒流咽重關古路荒峽雨無朝暮春風有別離雨過

春城暗潮迴海日低烟深南浦樹帆落海門潮重湖鳴

夜雨高館帶春花遠寺疎鐘到深燈夜雨畱亂雲堆野

壑急雨失歸舟山畱萬古色人趁一朝晴雲凝湘浦夜

亦現真淡 卷七 亦有生齋

月落洞庭秋可與愚山抗行

前輩作詩隨時改定晚年全集往往與初刻互異如查初白別弟詩與爾未曾經遠別得歸或恐是明年後改得歸難定是何年徐辛齋潤州詩山俯南朝寺江圍北府城後改山湧西津渡江春北府城又一本作山上南朝寺江頭北府兵此類名人甚多杜陵所謂老去漸於詩律細也

閨秀許權字宐嫵江州人乾隆丙辰進士崔謨室也著問花樓橐有折楊柳二首云雨葉烟條絲一圍翠樓閒處亂花飛江城驛路三千里不見人歸見雁歸檻外青青風正飄一春愁對董嬌嬈柳花見說為萍去再不成

縣上柳條一時傳誦

吾邑董侍御玉虬

文驥

孝廉舜民

元愷

秀才文友

以寧

三董竝

負盛名玉虬微泉閣集舜民蒼梧詞文友正誼堂集及蓉渡詞俱卓然名家文友尤擅才子之目柏鄉魏文毅齋未識文友面而傾倒欲絕當時以為公論近日宜興史位存承謙任澹存曾貽選列朝詞雋而不及文友何耶

董侍御晚年家居頗留意推挽後學延虞山錢湘靈先生主席一時英俊多從之遊其論詩以鍛鍊為宗然工

是派者率多不達莊阮尊令太史嘗輯毗陵六逸詩集

六逸中如楊起文

宗發

陳道柔

鍊

胡芋莊

香

董叔魚

大倫

皆

湘靈高足也

王阮亭衍波詞虞美人一闕云杜鵑庭院春將了斷送
花多少幾層楊柳幾層風總付銀瓶金屋夢魂中合歡
枕上香猶在好夢依稀改迴環錦字寫離愁恰似瀟波
不斷入湘流瀟湘字破用新絕後見陸龜蒙採葯詞問
人則不屈不宋說地則非瀟非湘則前人已分用者
矣

先外祖董清溪

瑜

先生任俠好義慕朱家郭解之風家

故饒於貲晚年揮斥殆盡琴書嘯咏晏如也百家技藝
之術無不通尤精繪事見推於憚南田高士幾與抗行

宋漫堂尙書撫吳日欲招致之卒不往余家舊藏先生
畫冊親黨借觀竟爲乾沒殊可懊惱猶記其題畫絕句
數首風致灑落亦復不減南田桃柳爲友人洞房云絲
絲暖雨正春朝露壓紅流出澗橋珍重漁郎尋路入好
聽風度玉人簫竹石云蕭疎碎影能篩月歷亂繁枝欲
剪秋頑石不堪驚米老虛心或可動王猷玉笛梅云和
風澹蕩靜無聲素魄香魂畫不成占盡春風好顏色何
曾五月落江城自注本名玉蝶誤寫淡墨荔枝云骨細
肌香瑪瑙胎佳人笑口自應開書生潑墨描來易不用
紅塵一騎催

吾邑楊芝田大鶴宮諭九歲補弟子員十一食廩餼時尊
人靜山廷鑑修撰與塾師某杜鵑聯句云何處攜來血染
絲師云洛陽橋畔乍啼時顧謂宮諭曰一句說花一句
說鳥下當如何接宮諭應聲曰最憐月皎花明處聲滿
空山香滿枝塾師歎絕

楊陶雲

大鯤

芝田先生兄也順治己亥進士由庶常謫新

建丞楊大聲

昌言

贈詩云早歲鳴珂

帝里中一官今赴

古宐豐神仙其比南昌尉父老羣迎太史公夢繞花磚
移曉日哦成松廨起秋風物華樓畔應回首儻憶東皋
樹樹紅和平之音深於慰藉陶雲後終山東按察使

吾邑莊編修阮尊題畫荷贈包虞軒

括

太守云清姿不

愛鬪春風六月花開一鏡紅恬澹性情渾似水托根應
在碧溪中雨濕露沾都不受苦隨風力戰狂波行天日
色紅於火是處清陰借蔭多斟酌香山頌竹詩碧池新
漲醉吟時低頭欲拜玲瓏藕一樣心虛是我師各藏身
處不同羣嫩苗新房一蒂分不是此花貪結子天公畱
與繼清芬四詩分寫花葉藕蓮各有寄托章法井然又
嘗自江右歸里夜與賈船同泊估客因問何姓自何處
來載何貨戲作二絕荅之云攜筇踏徧嶺頭春一權西
江復問津山木陰中秋水岸濠梁曾作釣魚人握筆空

知賦子虛一生落拓老相如奚囊長物全無用幾卷山
牕舊著書可想見先生風趣矣

侍讀楊企山

述會

先生長於史學詩宗杜蘇乾隆丁卯典

試滇南著有使車集佳處直逼東坡惜未鈔錄但記其
贈桃源汪令一律云繞城楓葉爛於霞猶似秦人洞口
花此地溪山真絕世何時雞犬共攜家相逢都覺衣冠
古重到翻嫌道路賒多爾情深千尺水江頭送客月初
斜

先君子頗耽禪悅嘗夢中得句云老僧腳闊走天涯到
處尋家不見家始信從今有歸著亭亭一朵玉蓮花想

見夙根慧業中年以後受持準提咒金剛經頗著靈異

宜興汪玉田

溥

贈詩云經年依淨土閉戶卽深山證道

追人譜

先生嘗仿小學內外篇作人鑑

元功見玉顏邱園心自樂雲鳥

意俱閒願得從函丈栖遊任所攀

科場兼作五經文字自前明洪武庚午迄崇正癸未鄉

會試代不乏人甲戌榜龍溪顏茂猷思陵特旨命題名

會元李青之前九屬異數

國朝順治乙酉丙戌康熙

戊辰等科以五經邀甲第者亦復不少然皆監臨科道

特疏奏請否則以違例貼出壬午以後有

旨願作五

經者聽敏速之士誇多鬪靡視爲終南捷徑矣乾隆甲

子陽湖生員白仲徵倍五經之數作四十六篇監臨某公格於成例不敢入告竟致貼出白遂恚死甚矣文人好勝而益歎憐才之難也此例今停

王阮亭先生位至尙書卒於康熙五十年壽七十有八貴仕高年實爲詩人弁冕乾隆中補謚文簡士論榮之福王時欲謚戶部侍郎高啓爲文愍刑部尙書王世貞爲文憲孟津爲相力沮之遂格不行詩人有幸有不幸如此

咏明妃者多矣近見明彭彥寶華詩云抱得琵琶不忍彈風沙獵獵雪漫漫曉來馬上寒如許信是將軍出塞

難諷刺微婉與橫使議論者迥別

釋禪鑑咏四皓有句云因秦生白髮爲漢出青山語亦新色

溧陽史文靖公生辰一門生祝聯有勳業邁夔龍之語公一見瞿然謝曰寫作俱佳但某不敢領初猶未解其意及見公容色不豫乃悟聯中犯公父宮詹夔諱遂踧踏不寧而退或云門生卽李中丞鶴峯

臨川李司農穆堂絨未第時布衣芒屨徒步來吳中與諸名士角逐嘉定張匠門先生主講席遂問字於匠門先是匠門弟韋齋官江右識穆堂預爲說項由是激賞

倍至惟駢體未工稍爲指授而去康熙己丑穆堂與匠
門同入翰林修年家禮不復相下而學問亦各有所得
匠門主溫雅穆堂主闊大也穆堂詩如夕陽千樹鳥聲
寂涼月一庭花影深短堞一空雞絕唱敗槽百齧馬多
聲頗清警可誦余最愛匠門一絕句云鳥背嵐光過夕
汀碎萍魚唼水花腥青山一角湖三面記是塘西乙未
亭取料甚新神韻亦復簡遠

長洲沈歸愚宗伯七夕云只有生離無死別果然天上
勝人間此語未經人道

閨秀吳文璧永武進人董玉蒼室著有苔牕詩草咏虞

姬云大王眞英雄姬亦奇女子惜哉太史公不記美人
死可謂讀書得間

陽湖楊南畝晉會蓉湖雜咏云我愛蓉湖好柴扉傍水開

四圍山色繞家住小蓬萊漁艇小於豆湖光闌於海一
艇一漁翁一歌一欸乃睡起捲湘簾一湖好春水隔柳

聽鳴榔漁船出沙嘴活水魚堪煮青帘酒易沽杏花村
店裏紅衷自當壚諸詩頗有風致里中竟無知其人者

宜興陳浣初克猷迦陵先生嗣孫貧不自存依其大阮銀

臺公履平於商邱遂占籍游庠未幾卒無後中郎書籍未

知付與何人矣平生佳什頗夥余僅記其步漁洋秋柳

句云杜秋鬢鬢思初嫁商婦琵琶憶盛年我亦飢驅無
定者攀條惆悵夕陽邊

下第詩無過李廓榜前潛制淚眾裏自嫌身氣味如中
酒情懷似別人若孟東野棄置復棄置情同刀劍傷激
而直矣程魚門晉有句云也應有淚流知己只覺無顏

對俗人又某一聯夜來夢好都無準日者詞窮別有云
皆能曲繪情事

突已夏需次都門諸朋好過從殆無虛日余謂曰如此
恢台不能挹爽西山茶瓜結夏庶幾平原十日與麴生
輩鞭弭從事耳然不有吟咏何異一鼓牛飲耶時拈韻

得肝字程霖巖景學博首倡云華顛更校揚雄字素食

還資仲叔肝蔣澄川熊戶部云鄉閒楷範尊龍腹薄俗

文章笑鼠肝管松厓幹編修云吾儕出世原雞肋公等

談經異馬肝余亦和云斗室儘容知己膝貧餐那藉故
人肝自是更倡迭和率以爲常一月之間得古近體詩

三百四十餘首遂編其詩爲消夏集歲月旣邁宦游各
方藏鉤擊鉢之歡邈不可再鼇江紀此振觸黯然

宜興朱柘田受戶部詩筆健拔閒涉宋調亦伯仲山薑

紅豆閒嘗題余攜酒聽鶯圖云雪苑鶯啼欲暮柘城絲
柳初攢社公小雨潑火酒色輕陰作寒無絃之琴不鼓

有杯入手當乾忽憶風花時節我來剛抵秋殘

李崧字靜山江陰人忠毅公再從孫著有芥軒詩集題

虎邱寺云樓閣參差綠樹閒夕陽人散鳥飛還山僧為

放雲來去夜靜寺門常不關佳麗名區寫得爾許蕭寂

風致自別又荆溪徐雙楠洪鈞夏日題虎邱寺壁云山容

依舊翠鬟開寂寂禪宮長砌苔應是花叢看已過更無

人為綠陰來感慨風流亦不落尋常思路也

王韓起學琦江陰諸生著有燕石集春日風雨作云廉纖

終日雨蕭颯滿園風小艸作深碧孤花落晚紅人惟居

硯北春已去牆東賴有尊中酒兼旬猶不空風格頗類

遺山

邵星城語余云陽羨儲玉琴潤書中子先生孫也弱冠工

詩宿遠塵精舍云眠愛蒲團穩心如坐衲閒秋聲全到

枕清夢不離山伴佛燈雙穗窺人月半環頗聞松籟裏

時有鶴飛還余於儲氏締交頗多獨未識玉琴錄此詩

以志神往

常開平裔孫某中山壻也鼎革後居湖孰種菜自給人

謂之湖孰菜此可對邵平瓜新安汪于鼎洪度有湖孰菜

歌

朱幼芝景英司馬湖南武陵人嘗訪友詣侯官許氏甫入

亦見貞炎

卷上

十

亦有生齋

門如舊游地因詢主人云此內有小樓樓上一聯云無
可奈何花落去似曾相識燕歸來尙在否主人曰信遂
引之入徘徊悵悵不忍去一老婦隔簾諦視謂侍婢曰
適纔官人絕似五叔乃知朱君即其後身樓中聯句即
君宿世書也已亥偕君分校棘闈贈余以詩余亦和之
有金環夙業似君稀句即指此事

古樂府方局十七道某會知何處某會隱語期會蓋言
如方局而止十七道則某會在何處耶又柳州集石枰
黑脈赤肌十有八道此蓋石紋如是後人未明其故遂
謂古局有十七道十八道之異

汪澤周溥宐興諸生博雅工詩與余交最久余爲刻玉

田山房詩五言如碧空微有露涼院欲消螢秋一月秋長

待汝九日始爲花晚桂木落山無障江空月有聲焦山綠陰

愁薄暮豔粉易生寒牡丹七言如亭遠忽從烟際沒樓高

先覺雨聲來賜書樓一夜隔江風雪盡樹頭初日下晴

沙清楓渡此例甚多歌行頓挫清壯如匡廬三疊泉周

孝侯射虎圖諸葛武侯銅鼓歌最奇儲畫山先生云清

思似雪高調入雲格律既深意趣復古近人中最深於

唐者

宐興儲畫山先生以古文辭擅場詩不多作少時賦秋

亦見... 亦有生齋

思詩有句云畫簾清簟三山影疎雨微雲七月天秋水
渡邊無去槩夕陽亭下有迴潮神味清深不失為李嘉
祐郎士元一輩人語

宜興謝明經皆人方工五言絕句嘯莊諸詠不減王襄

阮亭先生嘗激賞之吾邑楊藕塘士翰編一日持館閣

課囑令捉刀彊而後可乃至閉置一室終日不成一字

楊笑曰高文典冊用相如公固山林之秀也

荆溪史上舍衍存承工詩庚辰秋與余定交白下其論

詩意見多與余合嘗云作詩之訣用實不如用虛用繁
不如用簡用假聲調不如用真性情此語最的又云唐

初沿梁陳之習靡而無骨陳伯玉以古調振之宋初尚

西崑之體華而不實梅聖俞以雅音振之明初染廉夫

之障縟而近滯高季迪以逸氣振之 國朝承明末之

弊廓而不真王阮亭以秀骨振之其論宋詩云莫生於

黃山谷莫硬於王介甫莫熟於陸放翁莫俗於楊誠齋

莫纖於范石湖莫鈍於陳簡齋余謂放翁善達難顯之

情正是熟極生巧七古尤馳驟有法餘子正未可同日

語也

史衍存嘗仿敖王二公作 國朝人詩評一則云施愚

山如山雪初消園梅乍吐疎花冷蘂觸袖馨然宋荔裳

如豪家張宴錦幕銀尊華彩奪日王西樵如溪光透徹
山色清華王阮亭如上苑春花瑤臺秋月芳菲滿樹光
景照人朱竹垞如河陽重鎮獵獵旌旗自令敵人望而
心戰程周量如月下橫簫聲多嗚咽吳漢槎如胡琴羌
管獨奏邊春動人處尤在落梅一曲陳迦陵如公孫大
娘舞劒器渾脫瀏灘頓挫炫人目晴王幼華如秋江夕
照雲物奇麗孫豹人如西人彈琵琶音節慷慨特多秦
聲陳元孝如吳下名山峯巒若秀少巉巖崩劣之觀吳
天章如漁人入武陵源流水桃花香非塵境梅耦長如
清露晨流新桐初引彭羨門如漢宮人柳臨風綽約有

三眠三起之致周櫟園如雨洗修篁娟娟可玩潘南村
如蟲吟籬畔蟬響林皋音韻蕭然不耐久聽湯西厓如
伶人當場儀容楚楚而哀樂不真陳子端如吳人作洛
生咏時帶老婢聲宗梅岑如穠李天桃未離凡豔宋牧
仲如村醪初熟風味劣薄不能醉人嚴蓀友如雨過花
枝香微色淡田綸霞如傀儡登場舉止儼然殊無生氣
顧梁汾如一曲明流蘭芳堪擷李武曾如盆中綠萼風
致嫣然止宐於案頭作供汪鈍翁如秋原平曠叢長蘼
蕪頗有寒花點綴王孟穀如重巖飛瀑一瀉千尺寒氣
凌人不可久睽汪季角如初地禪談名理不無入處而

心地尙欠空明吳園次如弱柳迎風不堪攀折

史秀才位存承謙衍存難兄也工填詞詩亦有致五言如

閉門紅藥盡高臥綠陰深風濤臨大別烟月在中湘七

言如雲垂平野星初上馬走春沙夜有聲撲蝶會過春

似夢漪裊人去水如烟此類甚夥惜乎芳蘭早凋長轡

未騁

蔣涑陞驥先生吾鄉名宿也老而不遇嘗書闌卷尾三

絕云廿年邊塞老橫戈寒夜空驚醉尉訶眼看平陽門

下騎城東列第正巍峩忍將國色委沙場一曲琵琶淚

萬行自是承恩非在貌不關毛壽悞王嬙玉房烟舍鬱

迢迢九轉丹成枉自燒從此無心添竈火欲尋王子學

吹簫情致蒼涼真堪酸鼻

草不世情隨地綠花知客意入簾紅溧陽潘汝庭句自

是庭草無人隨意綠化身而用意自別

茅屋當門月清溪滿櫂雲畫山先生幼子仍叔知行句諸

儲長於詩而仍叔才最高惜不自收拾暮年沒於水

徐右雲煥龍荆溪名孝廉也其子婦某吳人工詩早卒有

風動春衣欲化雲句一時傳誦比於迦陵人在東風二

月初云

吾邑周少司空蓉湖清原客嶺南時有仙人降乩云月明

有水皆呈影風靜無塵別遞香周子誌之他日自有用
處後入都會廷臣薦舉鴻博平原董默菴訥總憲先以
詩試士命咏白丁香花周用此二句極賞之遂入薦
宐興吳秀才師石介少負才名年三十而夭有句云斷
崖殘雪挂清磬夕陽浮嘗以詩謁錫山顧梁汾舍人顧
贈詩云老夫直下低頭拜不比尋常說項斯前輩之獎
掖後進如此

長興王立夫豫詩有別才嘗賦若溪絕句四十首風調
殊佳吾友汪君澤周記其二首爲余誦之云一春長恨
雨瀟瀟記過吳王送女潮輕薄桃花嗚咽水縱無離恨

也魂消選勝還須覈棘車石門山色美何如茶花開徧
深深塢暢好風光是夏初

玉溪無題詩託興遙深自是騷人遺意金沙王次回賦
寫閨閣幾于蕩魄銷魂左袒者藉口刪詩不廢鄭衛而
歸愚沈氏矯枉過正則并玉溪而詆之然此體亦頗難
工就所見聞擇其雅者錄數聯于左彭羨門云仙路無
緣逢巨勝珠胎有淚滴方諸王西樵云下杜城邊分驛
路上蘭門外足長亭王阮亭云天上碧雲方薄暮人間
紅杜易驚秋朱錫鬯云人前容易風吹裏夢裏分明月
墮懷陳其年云烏啼北斗三更後人在東風二月初顧

多石理言 卷一 三
俠君云可人似夢尋難見恨事如萍著卽生郭于宮云
事如食欖兼甜苦心似操舟乍淺深儲從彥云古道金
隄生死別夕陽珠閣往來看

先生長者君公尊稱也皆他人稱之之詞然漢祖問四
皓姓名其一自稱角里先生魏哀王時游士自號梧下
先生皇甫謐自號元晏先生陶潛自號五柳先生王績
自號五斗先生白居易自號醉吟先生唐彥謙自號鹿
門先生李昭妃自號樂靜先生江端友自號七里先生
孟子拒留行客酈食其初見沛公伍子胥自剄時俱自
稱長者酈食其對漢使及齊王田廣俱自稱而公漢祖

對酈食其陸賈自稱而公廼公司馬遷自稱太史公徐
陵與王僧辨書自稱徐君王僧達祭顏光祿文自稱王
君張說祭殷仲堪文弔陳司馬書竝自稱張君王績荅
杜之松馮子華與江公重四書竝自稱王君至顏延之
以何偃呼爲顏公荅曰身非三公之公又非田舍之公
又非君家阿公何以見呼爲公特以其輕脫怪之耳
士之未仕者曰處士女之未嫁者曰處女宋史藝文志
有處士女王安之集一卷案陳氏書錄解題安之名尙
恭簡池王亢子蒼女年二十未嫁而死詩雖不傳其命
名殊新異也

史記楚世家吳之邊邑卑梁與楚邊邑小童爭桑伍子胥列傳楚平王以其邊邑鍾離與吳邊邑卑梁氏俱蠶兩女子爭桑女子小童無甚關繫但一人之記載不宐岐出也

晉書徐廣字野民成晉書四十六卷年七十四卒南史廣字野人年過八十猶歲讀五經一遍元嘉二年卒撰晉紀四十二卷余案二說互異延壽專門之作實集諸家之成固宜佳於正史然嘗預修晉書南北史又同時表上檢點之疎二者必居一矣此類頗夥姑舉一端仁和邵錫蔭宏簡錄後序云編年之體期於馬遷又云

百藥之子延壽刪定南北二史余案司馬氏易編年爲紀傳夫誰不知李伯藥自有子名安期而延壽父故大師也紕繆若此竟侈然爲先正作序耶

泉州洛陽橋建於蔡襄修於蔡錫相傳有醉隸捧檄投海神俄而回文書一醋字乃以八月二十一日酉時定趾海潮旬餘不至橋遂成陸伯生廣輿記周櫟園閩小記何鏡山閩書俱謂蔡襄事陳莘學雒陽橋辨譌宋牧仲筠廊偶筆俱謂蔡錫事余案端明碑記云橋始造於皇祐五年四月庚寅以嘉祐四年十二月辛未訖功則非八月二十一日酉時定趾矣歷七年而工竣則非旬

餘遂成矣又云廩金錢一千四百萬求諸施者而通志
蔡錫傳則云橋圯出石刻有石摧頽蔡再來之語錫捐
俸修之既云捐俸度無有大興作而檄海張皇又復神
奇其說豈端明前知抑別有偽作此識者耶名宦既列
錫傳而橋梁志備載修洛陽橋姓名獨遺蔡錫至海神
書牒事又兩蔡竝載覈實之謂何錢明府碩齋濟世後蔡
祠記謂牒神乃古人神道設教與狄武襄百錢卜勝同
世父述庭奇先生詩云紛紛齊東語何年謬相沿遣吏
牒海神醋字書回箋云是端明事傳說滿道邊柱史博
攷據辯譌著新篇至誠格神明於理有固然或云聳民

聽古人寓機權真贋不可知稗乘鮮真詮荒唐置勿論
遑辨後與先真如老吏斷獄也

宋史陳思讓子若拙太平興國初進士以第二人及第
當時號爲榜眼及李昭遘子杲卿杲卿子士廉皆一甲
三名人稱三世探花郎昭遘宰相李昉孫案陳思讓之
子欽祚而若拙乃其孫李昉之孫昭述昭遜而昭遘乃
其從孫昭遘亦未登甲科三世探花之說王仲言揮麈
錄云爾詎足據耶

郭璞江賦云洪蚺專車臺灣上帝廟有蚺殼長三尺餘
相傳靖海侯破鄭逆時爲某將軍負舟力竭死則亦波

多研瑣語 卷一
臣之桀者也諸暨壽芝崖同寓齋移置半合蒔花每宴春客輒舉以誇示云

宐興周東標士廣畫山先生高足制藝古豔絕類畫山詩

亦高雅如疎雨下黃葉秋風剪綠葵稻花生野秀梧葉

淡秋陰天畔雲飛澹林中月度明均可諷詠年已六旬

尙童子試學使某聞其名欲拔之乃是年適未入場周

聞之懊恨不已自投西泚卒

常熟宋玉才樂少負奇才常鬱鬱不得志送人避仇云

狂歌痛飲向來心贈別吳鉤抵萬金君到他鄉莫沈醉

酒悲時候最難禁

山陽邱明府邇求迥有漁燈詩云浦面碕灣暮靄平孤

帆不動一航輕遠從淺水蘆邊隱靜向寒江雨外明十

口就餐停晚擢白頭補網坐殘更無端閃閃愁將滅知

是風潮午夜生又有詠綠陰句六時不定收花影一片

無塵悅鳥情詠物之工自是謝瞿嗣響

余同年董庶常東亭潮陽湖人占海寧籍登第詩才沈

博絕麗爲嘉禾八子之冠在京師時嘗晚步近郊瞥見

姝麗彈琵琶甚哀潛誌其處翼日訪之但古塚纍然荒

榛彌望心竊自駭諱不敢言又數數夢游地府讖多不

祥歲甲申請假歸葬其先人未幾竟卒余以詩哭之有

垂死未忘封馬鬣他生應更會龍華及紅裏琵琶摧玉
樹青山泉石葬瓊華句蓋紀實也其從弟蕙疇思亦少
有雋才如黃鸝幾箇樹依澗蛺蝶一雙人閉門詠春草
句也

宋太宰漫堂西陂六詠名人率多和章余令商邱時與
嵩輔堂貴學使游覽竟日即席賦詩最愛其綠波村云
後夜伊人夢迢迢綠雲裏詞致清遠直逼左司余亦和
之云一夕秋風生人家葦花裏

金壇于午晴枋先生為吾邑楊笠乘士大令題江天一
笠圖云與君岸上從容計如此波濤如此風見賞於何

義門先生以此得名後入詞垣喜汲引寒峻才士多出
其門晚年家居尤耽談藝余以詩文投謁遂邀同往文
襄公浙江學使幕中嘗賞余天台道中清磬入雲閒句
謂不減唐人清磬度山翠五字

大學士劉文定公武進學廩生年二十六舉博學鴻詞
科擢第一廷試五六天地之中合賦諸徵士不解所出
多瞠目縮手公獨揮翰如飛桐城張文和公故睨公卷
對眾朗吟始共得題解詩題山雞舞鏡有句云似擬投
林方戢戢可能對語便關關一時傳誦時吳郡沈歸愚
宗伯亦以諸生赴 召試未第頰首曰吾輩頭顱如許

乃不如一白望後生得不愧死

釋超盛吾邑人姓莊氏通參厚存

摺

之孫儀部省堂

清度

之從子少年不偶披剃爲緇嘗誦唐人春眠不覺曉一絕遂悟禪理雍正十二年召對稱旨封無闕永覺禪師賜敕印住賢良祠眞異數也

吾邑錢文敏公以刑部侍郎丁憂回籍夢中見豐碑大書哀哀哀三字語令弟竹初孝廉竹初曰三口爲品披一品衣兄服闋當陞尙書耶未幾公歿贈尙書祭葬立碑乃悟夢識之異

吾友莊虛菴

浙

熟精漢書詩古文辭亦闖入大家之室

中乾隆戊子副車以家貧援例小就隨牒秦中中丞畢公秋帆極器重之其所爲詩多隨手散佚篋中偶存數篇因備錄之送管吳吉入都云搥鼓津亭送別難薄游幾載又長安秋來何限清霜阪野燒排空立馬看送蔣健之出塞云清秋幕府集嚴霜愛子從征赴朔方遼海文章師李賀帝城書札累陳湯觚椽金爵三生夢關塞青楓萬死鄉何日雞竿看肆赦還家猶得作臺郎斲酒示友人云瑟縮經年罷酒樽中懷聊復與君論本無高會同陶侃終鮮交朋送邴原先世未謀封斧葬孤生誰軫戴盆冤更思羊棗應專嗜話到行杯淚已吞

庚辰秋試報罷同人賦落葉詩用高青邱梅花詩韻九

首呂雲莊自嶽擅場其七云登山臨水總依依萬里寒蕪

淡夕暉天地側身迷北望江湖驚鵲杳南飛翠微寺裏

雲原薄烏柏門前樹亦稀直待春風破林杪相逢何啻

錦衣歸陳吉人訥秋田先生孫也詩亦有家法句云九

月清砧新婦怨一溪寒日小姑愁將軍一去功名薄司

馬重來涕淚多楊敦復簡句云謾言流水無窮意祇作

凌雲未到思清麗可誦

從父述庭奇先生才氣縱橫詩格出入唐宋少遊京師

與諸名士角逐一日作西山賦三宗考揮灑萬言有如

宿構錢絅菴侍講博學工詩負當時重望獨推先生為

勁敵每對人論近日作者輒字公曰無出吾鳴友右晚

年自定編年詩八卷五言如行其孤雲嬾歸輪獨鳥閒

白雲秋水闊紅樹夕陽多七言如得句偶逢花照眼舉

杯喜見月當頭暮雲是處懷人苦秋水無端別路長皆

清俊有味其九日登鼓山賦詩云石路千盤上雲林處

處幽鐘明僧寺午風緊客衣秋指顧收閩海憑臨小福

州相傳晴朗日依約見琉球或謂鐘明不如鐘鳴先生

不荅竊以示絅菴侍講侍講曰此字法亦句法也惟明

故午否則尙成句耶其人乃服

從兄葑岡大紳先生詩文書法竝推佳妙入都時錢綱菴先生贈詩云浮華悞騁悔難追勉子沈潛進取時聞道且旋河伯面策名須發桂林枝室虛似陋常生白衣素如新莫化緇他日置身清要地輸忠報國肯容私吾鄉自綱菴先生中癸未探花後至乾隆壬戌兄亦以一甲第三人及第可謂追步後塵不負期許者矣惜綱菴不及見也

陽湖莊本淳培學士少負才華不作第二人想乾隆乙丑令兄方耕存與先生以第二人及第學士賦詩調之落句云他年令弟魁天下始信人間有宋祁後果中甲戌

狀元嘗館課夏雲多奇峯有天際落芙蓉句頗自矜謝未幾卒此與蔣菱溪麟編修羊燈無燄三更碧句同一詩讖

甲戌會榜莊本淳先生中式第三會元胡紹鼎第二則吾師朱春浦先生蔡元也莊為長洲彭芝庭尙書堦尙書笑謂曰君當作狀元不見榜頭書鼎元莊耶及殿試果一甲一名一時語慧遂成佳讖

黃上舍仲則景仁詩才橫逸俯視一切性亦落拓不羈在都門為余題吟秋圖橫卷調邁坡塘云綠陰陰夏初庭院何來秋意如許丹楓黃菊都移到似聽候蟲無數聲

在樹有尺五疎襟約得吟情住問秋來路是流水烟村
夕陽漁網風柳最疎處賢明府十載鳴琴單父筆牀茶
竈家具苔窠石徑尋詩坐剛散竹間衙鼓吟更苦任侍
史青童竊笑官何故圖中如遇聽閩嶠東西鼇江上下
爭唱使君句卷中名作如林君故以填詞取勝然始終
未嘗與余一面也

趙舍人味辛

懷玉

工古文辭先君子志墓之文卽出其手

於詩尤工五言長律及七言古體曩嘗舉豪示余未及
選錄偶於扇頭見所書舊作二首錄之以存其槩焉金
蓮池用香山韻云小坐明池側浮蹤卽是家水清魚入

定山古樹無花文字難除障薰修近茁芽閒賡白傳詠
且喫趙州茶崇德道中云崇德舊游地帆風數往還有
橋皆礙艇無水不成灣雨後桑陰重春深鳥語蠻分明
列圖畫只欠補遙山壬寅春余自甘肅于後歸將之鳳
山時味辛方乞假旋里讌飲過從者旬日余有五年後
歸田之約味辛製金縷曲爲贈云春色濃於黛喜江鄉
廚開櫻筍又成佳會鬢影婆娑花綽約十日尊前相對
數舊雨寥寥幾輩足跡已周天下半把平生出處商量
再畊釣約恐難遂澎湖東去濤千派儘容看樽桑日出
神山鼇戴除却曾經滄海外何事更堪稱快況轉眼金

門報最狀擬稽含箋比鄭只歸裝便勝明珠載燕市酒
待君醉近補官京師久不得消息良友之言時復往來
曾次也

老友管紫垣復書法仿李北海詩宗雲間七子晚年染

指叩彈集嘗餞予赴浙江學使幕卽席分韻擊鉢立成
同人疑其宿構惜不復記憶矣

洪稚存亮孝廉詩宗昌黎出入義山昌谷嘗爲余題吟

秋圖云君年四十仕正強六年令尹官大梁哦詩先案
舞文吏折獄幸有談經長吟聲滿堂意超忽小吏鈔詩
腕俱脫忽然好句落裏閒猶飽羊脾口流沫披圖羨君

詩思揚杲杲白日輝秋陽寒蟬抱枝思同永獨鶴引頸
聲俱長長身修髯美無度松下非君置身處老屋溪山
北望深柘城士女南來慕我謂君德久在人滿意何不
圖陽春商聲近殺古所戒疑似無乃傷吾民君聞軒然
意殊俗春凝於秋志初肅詠罷寒桃露柳詩秋光偏向
衣裳綠此等詩雖非稚存上乘清氣自拂拂十指閒其
他惜無從採錄也

從姪賓鷺修業葑岡先生仲子讀書好古詩亦清雅都門

送余赴連江云連江饒勝景地接九仙山月射桄榔白
霞蒸荔子殷民風猶近古俗語不妨蠻劇喜先祠近泉

州水一灣

七世祖景陌公崇祀泉州名宦

旅況如蓬轉恩恩有去畱好

乘燕市醉聊作竹林游空谷聞音喜新霜對鏡愁河梁

一分手從此望書郵管松崖太史和云老去知音少驪

駒不可畱何因一春別都作八閩游為爾谷音喜將離

雲鬢愁行逢孝山史

謂廣

慎莫滯江郵

丹徒張蘭田

鑑

仗義急友復矯矯自愛善彈琴著論琴

十絕句見賞於袁簡齋先生程荆南

湘

明府為序而梓

之嘗與余清溪館倡和其談禪一律云執拂談禪酒罷

傾大千塵劫恨難平楞伽堆案消前業粥飯隨緣度此

生詎有七能堪亞佛實無一法可當情從今願學龐居士

士口吸西江萬頃明未幾遂卒年僅三十三惜哉

趙甌北

翼

觀察以詩雄視館閣著述等身嘗雌黃近時

作者自袁簡齋太史外鮮所當意己亥秋余自里中北

上贈詩云新詩一卷手親編雅意還參棒喝禪問道於

盲公誤矣望風而拜我甘焉消磨綠鬢人將老墮落紅

塵骨自仙得效雌黃亦何幸丁儀終藉定文傳

時余以近稟質

之觀

仙吏才名兩浙聞風流不減杜司勳西湖載鶴官

如水東野為龍我願雲故里暫歸欣結隊單車遠出又

離羣鄉邦詞客多星散把酒何人話夕曛不見叔度寒

暄載更清言霏屑何啻子荆零雨篇也

余題曝書亭集有杜陵詩格沈雄響一著朝衫底事差句甌北觀察謂此論未的竹垞登朝及歸田後詩始佳從前但作假唐詩耳不知竹垞佳處全在氣格初刻文類一編沈實高華自是景隆遺響至通籍後不過以料新調脆炫人日晴風格頹然放矣嗜好雖各有不同酸鹹固不可不辨

海鹽徐巢友

穎

康熙初結廬茅峯往來句曲道上雙髻

道服騎紫牛導以孔雀道路以神仙目之嘗作梅花詩三十首吟行不輟旁若無人猶記其數聯如空山相對靜如夜淡到溪雲亦是塵流水在門行處冷斜陽銜樹

望來空蠟屐此生能幾鞦韆驢明日又孤村古榦碎塵終化石空香入劫不成灰幽光瀉作水連屋積氣凝爲冰滿湖過牆新水浴眠鶴壓屋冷雲驚定僧真不食烟火人語也

炙硯瑣談卷上

炙硯瑣談卷上

炙硯瑣談

元史名脫脫者十有五卒於浙者二人一成宗朝江浙
平章一武宗朝左丞相也西湖雷峯塔下有丞相脫脫
墓舊志謂修史之脫脫余按修史係順帝時右丞相竄
置雲南哈麻矯詔酖死安得遠葬西湖世但以右丞著
名故附會臆說耳好古者當於浙中二脫脫考之

炙硯瑣談卷中

武進 湯大奎 曾輅

元史名脫脫者十有五卒於浙者二人一成宗朝江浙
平章一武宗朝左丞相也西湖雷峯塔下有丞相脫脫
墓舊志謂修史之脫脫余按修史係順帝時右丞相竄
置雲南哈麻矯詔酖死安得遠葬西湖世但以右丞著
名故附會臆說耳好古者當於浙中二脫脫考之

虞集詩一徑綠陰三月雨數聲啼鳥百花風張端詩送
却春光三月雨吹來花信幾番風三月雨為迎梅五月
為送梅見高德基平江紀事曩客東萊清明後盆梅盛

炙硯瑣談

卷中

一

亦有生齋

開琳曉峯朝刺史賦詩掖縣劉秀才夢錫受和云戶外
已經三月雨盆中尚護一枝寒律切著題與虞張可稱
伯仲

詩詞曲各有分界昔人論之詳矣然渭城朝雨黃河遠
上等篇詩也而歌於旗亭竹枝楊柳枝清平調小秦王
等篇詞也而列入詩集後庭花乾荷葉小桃紅醉高歌
諸闕曲也而收入詞調至於耆卿堯章輩之隨宮創格
升菴元美輩之自度新腔既恐律呂未諧而玉茗南北
劇之絕豔驚才亦病棘喉澀舌二三作者僅僅固執圖
譜研求體裁豈知樂緣於聲聲寄於詩古人歌詩贈答

不外三百篇唐初樂府流傳率多五七字其詩降而詞
詞降而曲乃風會之自然卽聲音之流變不審乎此而
填詞則小紅難諧低唱之律度曲則優伶翻爲顧誤之
師又何怪詰曲詩魔目不識紅牙翠管者哉

邵飈園讀相如傳詩云長卿不餓死操諸兩蛾眉陳后
買賦金卓女當壚貲嗟此安足多感激遭逢奇士窮貴
知己不論雄與雌歿後求遺橐傷哉落晚時首四語令
人齒冷絕世才人遭逢乃爾韓淮陰生於漂母而死於
呂后千古傷心同一關鍵則董文友蓉渡詞中已言之
矣

項羽廟有無名氏題念奴嬌一闕云鮑魚腥斷楚將軍
鞭虎驅龍而起空費咸陽三月火鑄就金刀神器塚下
兵稀陰陵道狹月暗雲如壘楚歌喧唱山川都姓劉矣
悲泣喚醒虞姬爲伊死別血刃飛花碎霸業銷沈雖不
逝氣盡烏江江水古廟頽垣斜陽紅樹遺恨鴉聲裏興
亡休問高陵秋草空翠伉爽悲涼絕類稼軒樂府自是
南宋人手筆惜不傳其名

竹枝詞有二體七言須音節清脆兼得縹緲之情至使
事用意不妨纖巧新異卽街談里語亦可遣運入詞前
輩名章不過爾爾近有好爲高論者見人作竹枝輒詆
爲聲口不類究問應如何聲口曰可以意會而不可以
言傳余爲之匿笑而已

高廷禮王元美胡元瑞諸家於唐人律絕中必盛推某
首壓卷互相彈擊較量毫釐附和者各左右袒試思以
二百八十九年之名流輩出家數二千二百有奇篇什
四萬八千九百有奇而欲舉一首以冠全唐果定論耶
詩三百十一篇未聞必推某篇第一也古詩十九首未
聞必推某首第一也自鍾嶸詩評三品已多倒置又謬
論源出於某識者譏之而庸妄子必欲標榜雌黃使後
人拾唾效顰牢不可破下至西湖竹枝等作亦爲之各

舉一詞爭新競祕此事何與卿飢寒耶

吳中徐昌穀詩祝希哲書沈啓南畫時稱三絕沈祝俱能詩沈詩天機清妙較勝於祝竹垞謂祝氏集略當遜昌穀三十籌然如莫食汨羅魚腸中有靈均等句置之歎歎集中正自難辨余謂此又藍本宋人徐仲車若見江魚須慟哭此中曾有屈原墳也

晏叔原謂元獻公平日小詞雖多未嘗作婦人語然如破陣子下半云巧笑東鄰女伴采桑徑裏逢迎疑怪昨宵春夢好元是今朝鬪草羸笑從雙臉生非婦人語耶彈聲林鳥山和尚寫字寒蟲水秀才楊用修鷓鴣天句

閉門羹護門草碧瑣紅橋不許何郎到鄒程村祇蘇幕遮句取料新僻徐虹亭亟稱之

空輿陳其年維崧失意無聊賦惆悵詞三章王阮亭司理揚州一見歎絕遂締交尾半闕云梨園內絲憎肉田園內花欺粟更泉麻謗錦蕢菴讒菊百隊錢刀爭作橫一身風雅單爲僕倚酒悲亂擊紫珊瑚鳴如筑怨極矣然不如此則不快

董文友席上看弄丸歌云臨淄卽墨天下聞鬪雞走狗紛如雲我來作客喜結納脣舌不減樓君卿銀花之脯八帶魚主人邀我飲半醺當筵少年擊鼉鼓更有少年

袒臂舞足下紅錦鞞腰閒五色組手持一丸摩雲端一
丸未落復一丸雙丸將落承以頂須臾重入雲中看更
出七丸在肘後兩手承蜩左復右旁有少年拍手嗤大
言此技安足奇摩頂至地身倒懸以足弄丸目不施七
丸上下聲相擊擊聲一依鼓爲節是時我醉不欲眠紛
紛羅袖屏前列摹繪清真如話如畫此龍眠白描手段
於老杜公孫劒器之外又闢一奇惜起徑稍平收場易
竭有才無福亦於詩筆徵之

妙取筌蹄棄想高妙也不著一字盡得風流自然高妙
也一字百鍊一語百諷興有微會緯無凡音貪使事好

持論者恐終身不解

落韻固忌平腐然好以險韻見長則謂之押韻而已縱
極渾成亦欠爽朗況牽湊割裂才人不免往見館閣諸
公限亦字韻率用步亦趨亦悅乎不亦等語豈不令人
軒渠耶

翩何珊珊其來遲畫工手筆曲終人不見江上數峯青
化工矣櫻桃樊素口楊柳小蠻腰是爲俗工香奩體作
如是觀方不墮冬郎雲霧

宋元人集中姑惡泥滑滑等篇原於風之鳴鴉責白鬚
白鬚荅等篇原於陶之形影神然須託興深長不得涉

滑稽訕諷至於詞體尤尚溫柔如辛稼軒之盃汝前來直無理取鬧耳劉公猷體比諸毛穎傳母乃推波助瀾

耶

早朝詩自盛唐諸作後無能嗣音鍾伯敬殘雪在簾如落月輕煙半樹信柔風阮亭謂如此措大寒乞相乃欲周旋金華殿中將易千門萬戶為茅茨土階耶譏之誠是成化閒慈谿楊柳塘子器早朝詩多至三百首其終篇云除却早朝無一事更從何處效驅馳公等碌碌大率如斯可發一粲柳塘又有排節宮詞句云春花將及九分九天氣又新三月三竹垞謂尋常百姓家皆可道之

不類深宮中語余謂其音節生脆頗類竹枝即不作宮詞讀亦佳

太倉崔不雕華詩丹楓江冷人初去黃葉聲多酒不辭

人日為崔黃葉沈歸愚以丹楓黃葉不無合掌易丹楓為白蘋歸愚好彈改名作往往點金成鐵此却大勝然亦有來處明鄱陽董士昂軒太宰句云黃菊清香人病

後白蘋風冷雁來初二詩風味何相似也

曹子建好人譏彈其文有不善者應時改定了敬禮常作小文使潤飾之曰後世誰相知定吾文者耶可見文章切磋端藉良友輟才安自矜許不通擊難黨同伐異

則詆訶倚撫不遺餘力間有直諒輒慮忤世焉能盡言
擬古必先擇題遊仙招隱之類無其志則不必擬四愁
七哀之類無其情則不必擬從軍行塞下曲之類無其
事則不必擬雁門太守廬江小吏之類無其人則不必
擬將進酒行路難之類太熟則不必擬朱鷺翁離之類
太奧則不必擬五雜俎六禽言之類纖而俚則不必擬
巴渝詞大堤曲之類靡而蕩則不必擬然猶無所顧忌
不過寸心得失耳至於詞涉微曖如十香詞之賈禍楊
白花之流穢不解元明諸老何以動輒效顰袁海叟被
讒佯狂幾至不保不當怵然爲戒歟

詩人嗜酒自古而然往往見於篇章具得妙理頃讀錢
塘李宗表彙煮豆酌白酒歌九雄快歌云煮豆酌白酒

豆肥酒氣溫相對二三子其樂難具論君不見曉來雨
過東家村叢叢豆莢生籬根阿翁提籃跣雙足采摘采
摘呼諸孫歸來笑指老瓦盆酒波猶帶新糟渾田家酒
具如窪樽一盃入口春無痕兩盃三盃鯨濤奔四盃五
盃如江吞須臾飲至百十盃眼花耳熱低乾坤憶昨豺
虎如雲屯旌旗滿目煙塵昏殺人如麻血成海十室九
家無一存大臣自合死社稷况叨厚祿承君恩近聞省
府日筵宴椎牛宰馬齊崑崙吾徒布衣在草野憂心慄

惻懷至尊嗚呼蕭艾滿城邑馨香不數蘭與蓀呼童煮
豆復進酒呼兒爲我關柴門又題鍾馗移家圖云綠袍
進士掀怒髯飢來嚼鬼如蜜甜酸風苦雨攪白日移家
欲往山陰尖隨兄小妹臉抹漆眼光射人珠的皜鬼奴
鬼妾千萬形蟒怪貓妖最蕭瑟勢能使鬼鬼不違髑髏
在後嗤鍾馗英雄如山堆白骨莫倚區區手中笏
昔人論詩謂工緻易活脫難然須卽工緻中有活脫處
如畫家趙文敏文衡山一流精細嚴密神韻自在筆墨
外若倪迂之枯木竹石以不了取致以蕭寥見奇特偏
師攻長城耳學力不可到吾寧舍旃

皇甫子循汴云關中之詩物燕趙之詩厲齊魯之詩侈
河內之詩矯楚之詩蕩蜀之詩澀晉之詩鄙江西之詩
質浙之詩嘽吳下之詩靡子循蓋欲雄視一世也然天
下大矣豪俊轉移風尚不當以方隅區之余爲反之曰
關中之詩雄燕趙之詩快齊魯之詩駿河內之詩閎楚
之詩茂蜀之詩嚴晉之詩慤江西之詩冽浙之詩贍吳
下之詩和

上元盛仲交時泰謁王元美三日之內遍和元美擬古詩

七十章元美爲之氣奪嘗爲子娶婦其妻戒勿他往忽
隨友人往城南古寺數日乃還妻慍而詈之乾笑而已

先伯父述庭

奇自

先生雪後飲徐辛齋

永宣

雲溪草堂賦茶

郎歌適是日嫁女家人屢至促還不顧比歸漏下三鼓
女行久矣因命酒復賦二律云白髮無情物從他鏡裏
長身閒婚嫁外興劇水雲旁酒戀鶯兒嫩詩吟驥子良
坐深還兀兀雪裏聳孤楊命嫁惟須母磨門幸有兒贈
聊攜竹筥棲已得梧枝作合緣非漫忘情事頗奇老奴
如我適頰首亦何辭二事亦復相類

華亭董元宰

其昌

尚書書畫詩文俱秀韻入骨忽一日攬

鏡自照則嫣然一女郎也大驚未幾卒宿世詞客前身
畫師才人寫照語耳鏡中現此變相何耶余嘗題容臺

集有云尚書書畫掩詞章妙墨依稀識瓣香閒代風流
兩文敏鷗波亭子戲鴻堂

侯官曹能始撰二異人傳一華亭唐仲言

汝

失明一鄞

縣李公起

堉

耳聾口啞均能勤於箋述不廢吟咏洵人

所難仲言夜別陸長倩云悵別高樓酒易醒坐閒落葉
滿沙汀春來儻憶同遊地無限垂楊夢裏青畱別沈茂
之云風雅翩翩自不羣榮華入目總浮雲江湖此去無
知己早晚移家欲就君公起山陰晚泊云落日山陰道
孤舟帶遠汀秋林紅葉重夕浦黑風腥客夢礎前斷漁
歌鏡裏聽來朝餘興在何處訪蘭亭當鍾譚盛行之時

而矚然不滓尤奇傑士也

嘉興錢而介應咏沈甫受蝶花居秋色云沈郎八詠世

爭誇草色庭中不讓花秋氣逼人清入夢夢騎蝴蝶到

君家騎蝴蝶創語亦夢語么麼栩栩安必南海蝶之大

如蒲帆肉重八十斤耶

剝復之理治象先見於小人亂機偏成於君子揭竿斬

木真龍之功臣也承平久而黨禍起太阿之柄君子實

倒持授人如東林復社當時所謂口談朝事案置漢書

頭包露額之中足著踏跟之履既可噴飯亦堪撫膺邦

國殄瘁安得不以先撥之罪歸之

少陵題畫云尤工遠勢古莫比咫尺應須論萬里何獨

畫然亦詩文三昧也華亭徐學齋祚贈予句云鶴向九

霄盤遠勢瑟於三歎有遺音可印證少陵之旨

唐人柳枝詞專咏柳竹枝詞則泛言風土如楊廉夫西

湖竹枝之類亦有專咏竹者殊無意致宋葉水心剗為

橘枝詞汪鈍翁亦有是作余入閩作荔枝詞專咏荔枝

傲竹枝體

漁洋謂宋人畱意金石文字者歐陽永叔劉原父呂進

伯趙明誠董道黃長睿薛紹彭外清波雜志有鄭暘叔

鬻集荆襄川蜀金石刻為五路墨寶迄今不傳亦無知

亦見續錄

卷中

十

亦有生齋

者南宋人陳起有寶刻叢編尤爲該洽按直齋書錄解題臨安書肆陳思者以諸家集古書錄用九域志京府州縣繫其名物而昔人辨證審定之語具著其下其不詳所在附末卷據此則陳起宜作陳思朱竹垞句云直待書坊有陳起江湖諸集須齊刊直齋同時不應訛錯未知朱王二公何據也

名人詩各有熟用語往往複見許丁卯集中有重複至二韻者或題異境同點竄復用或先稟後改流傳混淆選家竝收之殊失裁鑒

嵐齋錄張搏刺蘇州木蘭花開宴客命卽席賦之陸龜

蒙後至連酌至醉題兩句云洞庭波浪渺無津日日征帆送遠人頽然便倒客欲續之莫得稍醒續云幾度木蘭船上望不知元是此花身遂爲絕唱余謂此才人狡獪故作奇險以見趣耳若咏木蘭而必如此起法不太遠乎古今詩話作李義山游長安事今此詩見玉谿集中惟首句云洞庭波冷曉侵雲與此互異

胡文恭芳茂山詩云此地橫青嶂當年聳紫芬碧花岩下柰玉葉嶺邊雲寶勢三神秀靈風百草薰將軍精爽在可解勒移文宋詩選本刪却中二聯改題橫山列入絕句余按橫山卽芳茂山以晉將軍曹橫葬此故名見

常州府志今新刻文恭集二詩並收此校勘者之疎也
陳后山詩好用著字全集四百餘篇凡四十六見內有
一首兩見者送蘇迨云胷中歷歷著千年隨世功名小
著鞭登燕子樓云畫梁初著燕舟橫著淺河和魏衍聞
鶯云春力著人朝睡重退紅著綠春事殘未免數見不
鮮矣

太瘦生太憨生太忙生太憎生皆唐詩習見語宋劉斯
立跋寄人云道人今好在歸馬太遲生梁山泊分韻云
爲問風多逆舟行太緩生此可增入韻藻

仇仁父遠和吳東升詩云冰懸古樹花九雋雪漲寒江

水不渾雋字未經人用

會稽吳象超尊小阮好山著椽村詩鈔四卷九工小詩

五言如白雲畱晚磬黃葉捲歸樵小雨止復作片雲行

欲還七言如空院落紅中酒後曉山橫碧卷簾初暮雲

抱郭霾紅樹寒雨連江凍白鷗皆於研鍊中別具丰韻

六安程明府小峯峻以治行稱閒有吟咏必寄託遙深

吳修齡所云詩之中有人在也嘗自題滋蘭圖四首和

者數十家又秋聲六詠甚傳於時蘆荻聲云幾處夕陽

橫短笛一天風信落滄洲觸緒蒼涼丰神自遠

餘姚沈茂才望菴謙詩才沈博絕麗每遇快聞奇事輒

纒纒數千百言令人驚歎欲絕近體詩閒喜作白陸語
如云一春易做還家夢二頃難謀負郭田覺醅醅有味
也

清江鍾一舟拔博雅多才以申韓之學歷幕閩海一杯
一曲襟懷洒如嘗畫墨牡丹自題云滴露和煙寫鼠姑
天香玉兔貌來殊鉛華脫盡風神在爲問唐人認得無
識者謂不減南田也

南豐吳雲衣森余同年進士詩文書法竝名於時初仕
建始令再起遷滇南未及赴以舊案呈誤歸或勸之出
雲衣傲然曰胡長孺詩云二毛已非折腰具況與志願

常參差吾讀書課徒聊足自給尚能郎當作舞耶遂絕
意仕進著述甚富手自刪存古近體詩十二卷行世哲
嗣禹門中孝廉掌教芝山亦名士也

湘潭張度西九王午京兆試與余同出朱春圃先生門

余卷已擬房首緣係詩經改撥禮房向例五魁各占一
經遂首度西卷明年余捷南宮而度西以教習就選自
是睽隔音塵杳然偶閱吳象超粵遊集知其以詩鳴交
廣閒有題象超鬢仙曲云千年薄命只如斯賴有風流
絕妙詞好倚紫簫吹一曲秋墳不唱鮑家詩來如月降
去雲輕舊事淒涼隱姓名莫爲詞章重墮劫人間知有

許飛瓊感慨風流傷心人別有懷抱也

陽湖董華星達存先妣再從姪少受業於蔣濟航汾先生

長遊京師遇異人授陰陽形法家術甚神尤精尅擇有

奇驗壬申成進士補國子監助教告養歸東南大僚以

其術之神也招邀旁午餽贈金帛日豐修宗祠贖祭產

餘悉以分族之貧者長厚和易戚鄰無間言晚年得心

疾每食輒疑人置醜夫妻不咸余嘗作棄婦詞有云那

愁羹墮齒忽棄案齊眉蓋指此也比聞已歸道山臨終

三分其產一捐宗祠一膳妻一給嗣子壽七十有九

閩縣葉學博松根夢王午舉於鄉時黃十硯任丈重宴

鹿鳴一見賞識以外孫女妻之嘗註十硯秋江集援據

博核比於惠定宇之註漁洋近同官半屏其渡海詩云

信有神魚潛鼓舞絕無飛鳥敢遨遊參差螺髻三千島

迢遞鯨波十二更明河篇云神仙亦作有情癡世人那

惜相思死風味宛然秋江可識瓣香有自矣

荆溪儲太守玉函祕嘗賦紅牡丹云綠雲有意雕欄繞

朱粉天然國色妝時頗傳之辛巳朝考賦五月鳴蜩詩

云翳來槐一葉吟到月三更遂入選尋由吏部出守鄖

陽忤上官而罷

秦大樽朝刺史無錫人澤周語余有蛟蜃瓶歌一篇最

亦見遺錄

奇惜未之見誦其五七字如霜鐘殷四壁夜坐似深山
風梳平墊樹雲湧一樓山山容入室僧初定庭際無花
草亦香一枕春風眠不住門前知賣馬蘭芽俱有佳致
湖北胡會元紹未第時曾游彭方伯家幕澤周稱其送
彭孝廉密之歸里詩云相逢能幾日忽爾動驅歌地遠
聞秋葉天空走大河雞聲催夜短蟲語向人多我亦離
鄉久臨岐意若何

荆南風雅儲長源實振起之所著有石亭集抱碧齋一
壑風煙集於鮫集余未及與長源交而其同社諸君如
史衍存汪澤周儲玉函輩皆余執友也塵尾樽前輒琅

琅誦長源詩不置口記其佳句如多情寒夜燭有味小
年書雁花迷白露漁艇蕩秋陰雪情春有態山活翠難
名春衣乍暖飛蝴蝶綠酒初香薦蛤蜊酒家臨水齊挑
旆游女衝寒盡覆貂酒幔半因新翠捲扇紈都逐嫩晴
開燈搖旅思風盈幔蟲語秋心月半牆情關眷屬塵根
在身落江湖酒病深雖片羽一斑然置之大歷貞元間
當無媿色其七古九淋漓沈鬱如醉後偕同人登城西
望月及國山碑匡廬泉南園看芍藥等歌俱傳誦一時
文多茲不具錄

近見友人書賦恨一律云棄婦中庭對碧紗征夫塞上

聽鳴笳招魂難返傾城色去國迴思上苑花羈客登樓
空有賦仙人化鶴已無家深秋未抵懷人思萬里西風
正暮鴉余謂風調不減玉溪詢之係儲克莊作克莊宐
興諸生早卒

吾鄉蔣弱六金式先生讀書鶴蕩書齋曰菰米山房遶屋

清溪數重挈小舟迤邐而入如桃花源嘗自題云問津
到此路常迷村外孤村溪外溪偶爾得名齊雁蕩祇堪
擁卷獨雞棲居然和靖梅花屋亦有東坡楊柳隄只少
數峯林外列好將黃石補窗西讀此不禁尊羹鱸膾之
想

馬觀察墨麟維翰海鹽人詩宗杜韓懷古紀行尤多合作

王景略墓云遭際臥龍同出處才情捫蝨擅風流朝元
閣云樓上夜涼閒大被水邊春盡散諸姨措語殊妙

余分纂陽湖縣志鄉人投梅烈女狀請書女瀟湖農家
子字鄰村某年十二其夫夭卒女聞不食父呵之命採
棉湖上日暮不歸已投水死筐中但存棉數朶而已舍
生取義誠人所難而出自村舍髫年九屬僅事

朱幼芝畚經堂詩集佳句頗夥如卓午松移當院影守
庚人臥一牀雲意無盡處燈方借心太平時火自溫島
夷敢踞牛皮地閩帥曾乘鹿耳潮隊仗精工絕似宋人

亦見真炎 卷中 亦有生齋

之學西崑者

門人劉元贊可詩文詞曲俱工七言尤有風調呂城初

發云秋江依約暮潮平兩岸秋風第一程莫怪故鄉人

語少輕帆已過呂蒙城丹陽道中云秋水尊鱸九月天

沙隄衰柳半含烟白鷗未必曾相識風雨朝朝送客船

寄懷詞云匏落深慙見事遲請纓空負少年時渭城不

復匆匆唱心計麤於賣餅師悲莫悲兮生別離雁書消

息到春稀年來怕聽吳娘曲暮雨瀟瀟底不歸花信東

風次第催征夫空上望鄉臺生涯不及銜泥燕春社年

年一度來朔雁先期已度關春來江上幾人還不知已

作無家別猶自尊鱸夢舊山九日旅懷云故園秋色正

蒼茫一夜衾寒度曉霜歸去來兮籬菊老吾無隱爾木

樨香家難夢到方為遠道有鴻飛未是長風雨滿城天

欲暮幾年為客負重陽赴都門云乍驚客路秋來早翻

覺他鄉月倍明移舟江口云海門漫捲空灘雪江樹初

翻破廟風藏春塢云小閣曉寒畱鶴守美人春醉倩花

扶渡江云夜靜濤聲驚別夢月明帆影落空江平山堂

云烟銷樹影都環郭雨霽山光盡入樓兗州道中云三

春鄉思先花發萬里征人後雁歸感懷云食肉相非班

定遠無家別似庾蘭成秋夜書懷云懷人心事燈花落

久客生涯燕子憐交河道中云人隨社日離巢燕心似
 秋山出塞雲新橋雨泊云秋水懷人楓葉落蓬窗臥病
 雨聲多
 荆溪徐上舍薛劍湛善屬文詩不多作嘗讀書南礪山
 房得萬壑春苔綠映空句同輩俱為閣筆以屢困棘闈
 鬱伊而卒

沔陽州牧黃某宛平人一年家子贈以詩有燕臺聲價
 黃金貴郢水謳歌白雪清之句黃艷然曰若以我貲郎
 出身故相誚耶余以郭隗事解之然終未釋然也於此
 見操翰之難非讀書人尤不宜輕投筆墨

釋松門卓錫龍池旋主吾常放生池方丈語錄之外刊
 近體詩二卷其自序所得力多在丁卯集豔句如陶谷
 有春紅雨暗謝山無客白雲孤之類洵晚唐風調也
 金陵燕子磯宏濟寺有老僧默默余見時年一百三歲
 矣乾隆辛未

翠華南幸 賜詩云不會吟詩不解禪果然默默以全
 天半生塵世半生佛得號山僧得號仙亦人瑞也
 釋大復有句云寒意似催衣著絮雨聲不放夢還家楊
 聿修和司馬亟稱之

無錫孫氏女忘其名母病目失明無子女因矢志不字

繡佛養母二十餘年有咏梅句云針透紙牕香一線杯
量明月影三分一時傳誦母卒後遂出家為女道士

陽羨山中多產紅躑躅種別新舊新色紅芳舊色哀豔
瓣有淚點相傳玉局老仙自蜀攜來富家盆盎閒高不
過數尺而深山古寺根蟠幾丈花滿廣庭濃春破萼光

麗奪目恍在珊瑚島也他山猶不及漢川俗名由南嶽

洗腸池渡南嶺越數峯便入漢川山徑南嶽已秀絕荆
水而漢川更別有洞天桑竹村墟烟蘿石室參差古木
深谷無人處杜鵑皆數百年物遙望如赤城霞起村外
仍通西溪遊倦挈舟而返綠水桃花武陵源又一村矣

遊者於春暮為宐老友汪玉田溥說

崇正丁丑會試宐興吳貞啓登榜元里人演劇為賀有
姑蘇女伶色藝絕羣傾動貴顯纏頭賞賚累篋盈箱眾
方豔之一旦步罨畫溪見花飛水流山翠欲滴徘徊悵
悵誓不復歸遂結茅於會真菴之旁而栖老焉吳贈詩
云籍甚香名麴部頭霓裳一曲廣寒秋如何不作烟花
長忽漫抽身物外遊我亦三生杜牧之相逢偏恨看花
遲瀟瀟暮雨旗亭路誰唱黃河遠上詞

燕子樓題咏甚多都無新語門人劉元贊可虞美人一
闕云樓頭亂發丁香顆不啓歲蕤鎖只今燕子傷誰飛

一任雕梁空落舊巢泥樂天才思如霜信斷送芳花盡
墮樓不及首邱時難道尚書寵倖不如詩結意深雋得
未曾有

丁酉春余集諸同人於天香書屋中酒閒各舉近作一

聯爲合以次至余壻莊印三

達字

印三遂舉輒風將絮緩

疎雨墮花遲一聯座中皆賞之酒罷索其全詩乃出詩

一編體格皆宗唐人越數年余有臨洮之役還過里門

印三復袖詩示余則所詣益進詩亦不名一格如素規

澹明河芳蕤泣澄露延埜桑葉白繞岸桃花明微雲隱

半規浮烟沒遙翼清粹蔑所競豐嗇兩不受先榮靡後

彫遠期無近悅皆不減二謝語五言近體如寒鳥依夕
照落葉碎秋聲經秋雲影絢積雨月痕青漏與蟲聲閒
人先鳥夢醒風疎木葉下野曠夕陽多清籟生魚梵秋
懷入雁聲月生虛室白人坐一燈紅潭影經秋淨山光
入暮青長風江水蕩落日海門陰皆佳句也七言近體
不如歌行然若青溪渡口餘三戶黃葉聲中有六朝漢
南楊柳今成樹江上芙蓉秋未花碧雲月湧星三五黃
葉風高酒十千風調自勝余尤愛其鳥墮空中音及風
過不知處滿林黃葉飛時有幽禽來空林墮殘雪等語
妙悟尤可靜參也

太白斗酒百篇日試萬言倚馬可待宜乎著述等身乃全集不過數帙固知貴精不貴多迪功精銳鼎峙李何弇州四部橐束置塵閣耳

學王孟不成所謂刻鵠不成尚類鶩學昌黎昌谷不成所謂畫虎不成反類狗然王孟便於空疎家袁簡齋枚太史目爲貧賤驕人真切中流弊之論要須以意爲主以才運意則無所不可

余任德清時一日至半月泉見石刻東坡詩云請得一日假來遊半月泉何人施大手擘破水中天泉無足奇乃贊池作半月形耳如所云不成癡人說夢耶及按公

年譜時方還朝而詩云請假已屬謬誤考之全集亦不載此詩乃知盛名之下僞託者多矣

學古人詩當分別求之漢魏古詩樂府音節可到氣韻不可到辛苦學妃豨漁洋譏之審矣五古登山臨水宜學三謝纂言紀事宜學工部詠古詠懷宜學子昂太白正變旣備風格斯醇七古以高岑王李爲門牆以子美昌黎爲骨幹下迨宋元廬陵眉山淵源有自放翁遺山波瀾不殊至元白張王則又自成一體者也短古韋柳最工五絕王裴稱善七絕則以神韻爲宗龍標太白而外取法不少惟五律一體盛唐合格斲推右丞然學者

當從中唐入門切響虛聲貴乎兼備勿高言渾成致老
而無味也五排工部獨絕元白鋪張排比未免泛濫之
譏七律則自工部以降代不數人至明而青邱東陽提
倡宗風李何王李聯翩鵲起雲間繼之駸駸乎盛唐矣
惜乎後生多不自量譬諸秦廷之舉鼎而絕其臙也善
學者當求其性之所近而綜覈百家要歸一綫加以變
化勿墮笏趨庶乎奄有眾長獨臻至詣是謂大成

咏物詩不用典故則不切若句句典故如李巨山又蹈
錢癖之誚近人無錫吳黼仙峻最工此體咏碧桃云藻
井正凝千點露重門深鎖五更風梨花云五夜粉牆明

似月一樓春夢亂於雲新柳云春愁在眼芳程遠曉月
如眉鏡閣空白牡丹云接羅倒著真名士脂粉嫌施近
至尊楓葉云晚露盡情白夕陽無限紅用事用意不脫
不粘可悟咏物之法

無錫吳明經黼仙峻云詩法二字而已曰透曰脫十步
殺一人千里不畱行謂之透空山無人水流花開謂之
脫不透則不脫大謝以透而脫不脫則不透淵明以脫
而透從此推之可以悟矣

管雋山峯陽湖諸生少落拓不羈以秧馬詩受知學使
遂青其衿年三十餘卒吟橐散佚不可見嘗聞其一聯

云天地豈知人欲哭江山翻喜客無家
噍殺之音讀之令人於悒

舅氏蔣蓉龕

和寧

先生由翰林改官侍御詩才傾動館閣

過伏波廟云薏苡讒誰畀豺虎丹青畫不到麒麟荊州
云空灘何處陶公艦芳草當年庾信袍湯陰岳鄂王廟
云九廟傷心人出塞中原失色帥班師春柳雲端明隄
有鉛華累靖節門無車馬音暢好雲山唯送別不寒天
氣却傷春方竹云春風似翦頻教削秋露如珠不敢零
白桃花云亾息最愁紅粉豔避秦真覺白衣尊此例甚
多盡燬於火先生亦不復省記舊作矣生平工填詞未

遇時有蘇幕遮詠客燕云尾涎涎身踽踽獨自飛來覓
箇天涯侶幾陣瀟瀟梅子雨春色無聊任爾銜將去抱
孤情垂弱羽青瑣珠簾可也畱伊住一樣飄零吾與汝
便不逢秋客緒渾如許九膾炙人口

趙甌北觀察梓全集見示余謂曰爲杜紫微則不能爲
楊誠齋則過之無不及矣趙傲然曰吾自爲趙詩烏論
唐宋

錢大令竹初

維喬

余同年友也雅擅鄭虔三絕嘗贈余山

水小幅并繫以詩云如畫湖山我舊遊興來復此縱扁
舟春風似挽離人住殘雪紛紛灑敝裘經年風雨感題

襟別館重逢夜氣沈一盞更勞傾下若故人情似酒杯
深一勺水可知大海味矣

管松崖幹翰編才思敏瞻乾隆丁酉典試黔中往返作

詩四百首賦十數篇雕搜藻績擅康樂勝場記序亦絕
類柳柳州緣抱騎省之悲登涉閒時露悽惻語余集其
句爲題後云寒暑關心隻影知自將柳雪賦離思年來
骨肉紛多故采徧芳蘭欲遺誰到處山村竟夕畱松齋
人坐白雲秋人生可嘆飛鴻爪乘興還輸萬里遊萬里
西風接點蒼微雲籠日送朝涼溪山行盡不知處客馬
白顛僕馬黃步步秋雲自踏陳謂使旋遠峯如碧水如銀

四年三度持文枋實慶朝廷得此人

從兄夢巖以薦辟官龍游丞恬淡寡營任十八年卒布
衾書篋而外無長物也子二人皆諸生窶甚余過龍游
口占云雙松哦罷鶴歸家廉吏遺孤嘆落花今日過君
遊宦地更無人說鵲隨車

自浙入閩山勢奇突萬狀撚髭清興多在征途才了閒
如江郎三片石潑翠百里外嶙峋插天仙霞嶺鳥道入
雲險秀殊絕余俱有詩江郎石云平生愛石似襄陽到
此真成嘆望洋誰遣五丁施月斧削成三片落天閭孤
根但見雲無際絕頂微聞樹有香絕頂多旃檀樹要與甌東作

屏障莫將奇蹟詫江郎仙霞嶺云控引東南勢鬱蟠筍
輿詰屈入雲端振衣竟欲凌風去回首方知行路難遠
岫粘天森萬笏寒流飛雪響千灘諸僧但解迎冠蓋如
此溪山眼倦看

明戚少保用兵信賞必罰然用意頗不測嘗禦倭寧德
傳令退縮者斬其子爲前鋒登白鶴嶺見倭勢甚盛回
頭欲有關白立斬以徇三軍股慄用命倭遂平余過白
鶴嶺有句云形勢天教障海氛威名人說戚將軍郎君
喋血猶銜恨鶴唳空山不忍聞

論文之旨倡於陸機文賦劉勰文心雕龍繼之厥後韓
歐諸家遞有論述然文壇佳話罕有傳者他日擬做詩
話例輯成一編亦足資文人揮麈也

伯祖紫庭先生

誥

邑諸生康熙己酉出闈後夢登高阜

踞其巔餘人皆環拱仰視忽一牛自下疾馳上悸而避
之牛乃登阜巔及榜發解首牛窺渚而公先擬元以墨
卷爲吏所污臨榜磨去監臨韓大中丞杖吏至斃公賦
詩百韻謝之中數聯云謬入英雄殼翻增寵辱驚青蠅
污一點白璧棄連城未免窮途哭難禁伏櫪鳴自此絕
意仕進

從伯父又宐先生

自

遊三教堂見題覺公石像讚甚夥

戲拈四句謂覺公曰這也題石那也題石和尚覷破都
是饒舌時周震起爲覺公鑄像擲刀大笑曰子能得禪
家掃蕩法乎亦刻之於像側

徐星友名方高江陰人著有憺園詩草題居庸關云峯
巒匝匝衛宸居絕頂憑凌接太虛墨水遠烟籠靺鞨紅
雲朝日照扶餘秋清畫角團營急霜勁琬弓校獵初關
吏不須頻詰客於今萬里走車書涿州云席帽騎驢向
薊門茫茫往事不堪論風雲孰辨軒皇壘羽葆空傳蜀
帝村幾樹丹楓明夕照一行白雁下黃昏劇憐督亢陂
前水嗚咽常流烈士魂星友與吳門沈歸愚齊名號徐

沈歸愚晚受特達之知位至大宗伯而星友獨數奇不
偶老於諸生士林共惜之

錫山邵星城

辰煥

傲居江陰與徐方高家甚近時翁年近

八十妻子俱卒僅一穉孫一日天大雪邵過訪見翁擁
敗絮炙硯作某姓壽文凌兢不休謂邵曰絕糧數日敝
裘質庫中此橐成得白金三兩可暫溫飽也越二日往
翁擁絮如故所得金因鄰人喪父無棺悉與之矣
僧齊己早梅詩萬木凍欲折孤根暖獨回前村深雪裏
昨夜一枝開風遞幽香出禽窺素豔來明年如應律先
發望春臺下四句凡近無味可刪作絕句

少陵詩云晴牕檢點白雲篇劉須溪云不必所出著晴
牕二字更別不知詩家無杜撰字何況少陵仇滄柱注
中引證甚夥無一是者張燕公云西掖紫泥紱東岳白
雲篇杜蓋用此以頌田舍人也時公欲因田舍人奏封
西岳賦故又云揚雄更有河東賦唯待吹噓送上天
郭璞注爾雅有似詩句者如云鳳凰應德鳴相和百姓
懷附興頌歌賢者凌替姦黨熾背公而私曠職事陋人
專祿國侵削賢士求哀念窮迫

或謂古來無言閏正月者余曰不然元仇遠詩云閏正
月過二月來溧陽溪頭花亂開濃雲急雨洊雷電不待

鞞鼓花奴催

漢書張良傳說漢王燒絕棧道崔浩云險絕之處旁鑿
山巖施版梁爲閣也又韻會小橋曰棧有云棧字惟蜀
道可用少陵詩棧雲高不落是矣然此說太泥謝康樂
斤竹澗詩過澗旣厲急登棧亦陵緬斤竹澗在溫州樂
清縣東

荆溪儲長源

國鈞

水榭先生子也以工詩受知於盧雅雨

運使雅雨刊漁洋感舊集成長源題其後云題襟到處
狎名賢採擷精英在一編若準元家篋中例不應牽拂
到松圓北宋南施各擅場後來得隨說蓮洋論交不薄

多石詩 卷中
崑山體纖弱終嫌近女郎黃葉聲多酒不辭才名早已
冠當時如何鐵網搜羅遍翻失崔郎七字詩浮青詩價
重連城霧裏看花苦不明別有墊巾人激賞海棠楓葉
好詩名盧由是銜之按楓葉翠微空又雪壓一枝紅海
棠皆水榭集中句也水榭以詩質漁洋漁洋荅書有老
至看花如墮雲霧之語後揚州郭元釭于宮見浮青集極
爲激賞贈詩云他時應號儲楓葉又云一時稱謂渾無
定又欲呼君儲海棠長源爲阿翁舒忿故刻意評駁漁
洋文人相輕多成門戶大率爾爾
客有善降乩之術者偶一試之甫焚符乩忽震案大書

云何來天籟嘯高空咫尺元穹氣可通世事乍經無量
劫男兒盡是可憐蟲飽看江國多烟景久已榮枯付碧
翁讀破離騷參一語雲將準擬覓鴻蒙書畢竟去符使
云此鄭峯陽鄭也峯陽以疑獄竟受慘戮故忿懣之氣
情見乎詞

南城袁彥名諸生五十壽同人集宴賦詩一少年詩云
先生十五青其衿行年五十仍如故豈無伯樂空馬羣
偶爾驕驕不相顧袁慙然遂罷酒後二年袁登賢書而
少年已歿矣

野記正月十六日古謂之耗磨日官私不開倉庫張說

詩上月今朝減流傳耗磨辰還將不事事同醉俗中人
先伯祖紫庭先生謂諸生曰人不事事便耗磨隨之子
能開書倉啓武庫太乙老人燃青藜一照耗磨當避百
舍諸生皆粲而就位肄業

東坡云無事此靜坐一日勝兩日余謂陶侃惜分陰乃
真一日抵得十數日也佛經云是日已過命亦隨滅二
語最警策吾輩宜榜諸座右

無錫邵昺園

曾訓

咏綠萼梅云翠旌孔蓋九疑仙淪謫歸

遲若黯然日暮天寒修竹裏曲終江上數峯前芭蕉心
卷遙相憶楊柳眉顰對可憐望斷隔溪愁不見蘭舟空

倚水如烟杜太史雲川曰古今咏綠梅詩此爲第一嗣

見昺園小阮移山

煥

咏玉蝶梅云明璫縞袂總傾城誰

比梨雲怨未平號國鏡中山一抹邠王笛裏月三更相
逢蕭寺春猶淺獨立清溪雪乍晴珍重歸來眠紙帳高
情應解夢莊生雛鳳聲清自是竹林勅敵

炙硯瑣談卷中

彙編瑣談卷下

武進 湯大奎 曾輅

汝南秦鎬字京袁小修序其頭責齋集云今人字皆兩
 字而京字獨一自東漢以下無之矣朱竹垞曰自漢以
 降如顏之推字介李曇字雲劉乾字天羅靖字禮房元
 齡字喬顏師古字籀李眾字師李琇字琇張巡字巡郭
 曜字曜李恢字祚李條徐倫竝字堅竇思字恕孫晟字
 鳳毛欽字傑宇文審字審張義方字儀此外不多見也
 余案顏之儀字升即附見之推傳又庾於陵字介見南
 史彭樂字興王盟字侂諸葛穎字漢俱見北史李文字

緯見李君碑錢勰字穆范祖禹字淳見老學菴筆記
古人有名字相連者如謝安安石謝萬萬石謝石石奴
郭文文舉江總總持許亨亨道高乾乾邕劉豐豐生謝
鐵鐵石王懷懷周李賢賢和段永永賓李彥彥士權武
武美馮偉偉節獨孤羅羅仁張說說之杜牧牧之孟浩
浩然荆浩浩然郭忠恕恕先丁謂謂之許洞洞夫晁詠
之之道史正志志道楊濟濟道周南南仲陳亞亞之陳
輔輔之蔡伸伸道張緯緯文呂大鵬鵬舉陸友友仁張
埜埜夫之類有名字相同者如晉孔安國字安國殷仲
文字仲文蔡興宗字興宗王僧孺字僧孺劉孝綽字孝

綽任孝恭字孝恭江德藻字德藻慕容紹宗字紹宗魏
蘭根字蘭根崔彥穆字彥穆馮子琮字子琮郭子儀字
子儀張巡字巡李琇字琇郭曜字曜之類

莆陽科第錄宋三百年間莆人舉進士者九百七十餘
人諸科特奏者六百四十餘人其中魁天下者五人登
宰輔者六人明自洪武庚戌迄嘉靖戊子凡五十二舉
由鄉薦者千一百十一人登甲科者三百二十四人狀
元二人探花四人會元一人會魁七人解元二十五人
吾邑錢鑄菴人莊南村柱兩先生輯毗陵科第考自順
治乙酉迄乾隆戊戌亦五十二舉鄉薦甲科名數差少

於蒲陽而其中狀元四人榜眼二人探花四人會元二人解元二人博學宏詞科二人翰林五十六人登宰輔者四人尚書以下八座者共二十七人會魁傳臚并京堂科道主試總裁提學及藩臬等官不暇計也而又易名者六人入賢良祠者三人入昭忠祠者二人較之莆陽盛矣吾郡梁谿甲第仕宦之盛不減毗陵義興次之亦復元魁接踵郡志久不復修惜無有專書紀之者

江陰楊文定公

名時理學名臣初入都擬謁李文貞公

光地

先一夕文貞夢楊龜山先生過訪柬書楊時拜坐語良久而去明日文定至姓名祇增一字聲音面目宛如夢

中文貞心甚異之遂畱講授為高第弟子

詩人阿其所好往往有推許過當處如太倉毛亦史

師柱

遠感杜茶村詩云狂來自合歌衰鳳絕處猶堪紀獲麟此諸宣尼殊屬謬妄沈歸愚乃曲為之說以太白希聖時有作絕筆於獲麟證之不知太白本是狂言然云希聖尚是仰望竊比之詞此則直用褒崇虛實迥別況茶村又遠不逮太白耶至絕處二字尤不成語別裁收詩寥寥不免舍上駟而存中下也

錢塘王舍人赤抒

丹林

悼亡妹云急雪罷吟簷外絮大雷

空寄袖中書沈歸愚激賞此聯謂道韞咏雪明遠寄書

實事死事也用罷吟空寄四字則虛且活矣按此公論
詩多學究語試問題係悼妹若泛引二事豈復著題柰
何以尋常運筆詫爲指授金針也

萊陽姜學在實節貞毅先生仲子也布衣工七言斷句咏

白頭公云霜鬢逢春可自由老人端的爲多愁不知小

鳥緣何事也向花前白了頭淡雅可誦然意味頗淺吾

友邵星城辰詩云花前嚙嚙語春晴小院偏驚客夢醒

似爾無情頭尚白阿儂那得鬢長青只倒轉說來頓爾

生致

海寧查少詹仲韋昇飲陳樸菴席上賦牡丹云置身富

貴何須早到眼雲霞覺倍明時推擅場牡丹用富貴字

本常語少詹不著色相自得風流異乎多買胭脂者

通州係鸞書兆炳同年嘗作漁樵圖寄意題者數十家率

皆江湖贗體余爲補卷云漁父甘啜醅樵夫解笑土山

澤多畸人托跡類如此王孫淮陰臺買臣會稽市初衣

澤霧豹晚節罹孛雉咄哉羊裘叟不屑相助理亦有披

裘翁遺金棄敝屣賢者不可測人生行樂耳方今際休

明相期拾青紫巖壑冒終窮跡弛抱深恥倘據要路津

蓬萊去天咫胡爲久埋照淪落山與水想當坐濠梁清

冷盪塵滓空山縱斤斧快意斬荆杞漁艤樵歸來樵歌

漁繼起得魚亦不賣析薪良自喜醉便狎海鷗遊惟與
鹿豕何必連巨鰲時還采葑菲神仙不易得畫圖母乃
是恍遊秦桃源如逢漢黃綺我諷招隱篇因之悟遐旨
詩成質諸同人僉曰切實整嚴可以壓卷

凡作詩拾人牙慧最可厭如荆卿則譏其生劫秦皇漢
武則笑其驪山茂陵刺開寶則事事貴妃罪宋高則聲
聲二帝陸放翁表其家祭一語趙王孫責其身歷兩朝
似此陳言不勝枚舉羣兒諷不去口學究詫以爲奇此
尸子所謂松柏之鼠不知堂密之有美樅者也

吾邑錢文敏公

維城

云四言詩雅不必作東先生補亾已

恐非三百篇風旨近人開卷必列數首反成習套矣我
輩當力挽之予按太白云五言爲四言之靡則四言最
爲近古偶一涉筆猶勝於擬天門開君馬黃之類也

無錫楊笠湖

湖觀

少以詩筆著名中年絲竹陶寫寄情聲

律嘗著吟風閣雜劇深得元人三昧昔人論製曲須是
鉅才與詩詞另是一副筆墨旣宐傳演又耐吟諷摹神
繪影中人性情斯爲能事東塘昉思而後笠湖其嗣音
矣

吳江鄒蕙祺

淑芳

常熟嚴伯玉

燁

妾也能詩有句云洗手

自憐十指甲何因又長兩三分十字自注平聲按陸游

老學菴筆記云十字轉平聲可讀爲諶白樂天詩綠浪
東西南北路紅欄三百九十橋宋文安公宮詞三十六
所春宮館一一香風送管絃

吳縣倪稼咸

承茂

得名最早成名甚遲乾隆戊午鄉闈出

蘭溪趙觀察

錫禮

門下時趙以武進令同考一見稼咸握

手曰吾少日卽讀君文不意久屈至此藝林傳爲美談
然竟以一孝廉卒稼咸工填詞詩亦清穩如衰柳共憐
殘鬢短閒雲應笑客程忙佳句也

山陽周白民

振采

工時文老困場屋乾隆庚午省試寶山

朱覲辰

桓

邀大江南知名士會於秦淮白民夔鑠領

袖賦老將詩云百戰沙場功未酌偏裨年少早封侯敵
人俯首驚無恙法吏吹毛對若讎老馬躡雲偏伏櫪蒼
鷹羈錠欲勝鞫請看猿臂終強健射虎南山氣尚遒宛
白寫照也

錢塘周少穆

京

同友人湖上句云野鷗導我有閒意新

柳笑人成老夫風趣可挹沈歸愚宗伯亟稱之

江陰翁朗夫

照

工詩蓑衣云煙波雙鬢老風雨一身秋

帆影云殘月半痕巫峽曉夕陽一片洞庭秋與友人尋
山云友如作畫須求淡山似論文不喜平皆雋永可味
華亭李亦吾

進

悼友云誄文作自先生婦遺橐歸於後

死朋屬對甚活

遼陽蔡季玉 琬 高文良公 其 繼室著有蘊真軒小草辰

龍關云遺民老剩頭閒雪戰地秋閒郭外田關鎖嶺云

橫盤石磴危通馬深鎖雄關冷護雲江西坡云鬼燈明

滅團青血野塚荒涼嘯白楊皆沈鬱頓挫不似巾幗中

語其九峯寺云蘿壁松門一徑深題名猶記舊鋪金苔

生塵鼎無香火經蝕僧廚有蠹蟬赤手屠鯨千載事白

頭歸佛一生心征南部曲今誰是剩有枯禪守故林蓋

夫人父綏遠將軍 毓 平吳逆後隨獲譴咎歸於空門詩

即指此事也求之閨閣中殆罕其匹

太倉毛山輝 秀 諸生王存素 愨 室也存素娛情丹青淡

於榮祿雍正乙卯下第山輝以詩慰之云新妝競掃學

輕盈俗豔由來易日成誰識天寒倚修竹亭亭日暮最

孤清寒女頻年織錦機深閨寂寂掩重扉却憐鳩鳥為

媒者空向秋風理嫁衣重陽風雨滯幽齋失意人難作

遣懷籬菊已花還覓醉便須沽酒拔金釵得此齊眉便

白首青衿亦復何憾

張孺人 采 陽羨儲玉琴母也姊采芣妹成珠俱能詩孺

人過嚴灘望釣臺詩云極目桐江上高臺枕碧流乾坤

傳一客蓑笠自千秋芳樹閒中老孤雲望裏收歲時誰

亦有生齋

俎豆崖下有漁舟采芡和兄閒居云負郭須營二頃田
塵氛不到足怡然春塘草暖聽泉坐小院花深待月眠
漫把酒杯澆俗慮還將書卷結清緣世閒誰似西陵客
一臥煙霞四十年與諸姊艾蒨亭翫月云多時抱病臥
深閨且喜今宵手共攜芳徑草衰蟲語切碧天雲淨雁
行齊吟成新句茶初熟話到殘更月漸低清露溼衣渾
未覺怪他花影過窗西成珠和云空庭月色印中閨佳
節欣逢手共攜靜夜露沾衫袂冷隔牆風送管絃齊閒
憑曲檻清吟愜小立回廊絮語低凝睇忽驚秋思切一
行征雁過樓西張爲丹徒巨闕故不特封胡遏末振譽

一時而閨中之秀亦不減孝綽二妹也

儲玉琴秋蘭館筆記載近時閨秀詩皆清雅可誦丹徒
張淑貞秋思云人靜燈如夢羅衣怯晚涼露蛩吟草砌
梧葉下蓮塘月影逐花動笛聲愁夜長倚欄無一語心
碎爲離鄉江陰曹我聞雪霽云凍雀喧喧報曉晴朝曦
紅影上窗明深林風定梅花瘦老屋寒添紙帳清吟客
未歸驢背遠旅人初發馬蹄輕竭來小閣閑憑眺依舊
青山繞故城高郵陳箋咏落梅云風敲簷鐵雨聲殘更
道梅花落畫欄夢冷柴門新竹徑心傷水部舊詞壇翻
飛應與人爭瘦懊惱難憑笛訴寒任是飄零不須怨冰

心畱待後來看武進楊夢花和云空閨何忍問花殘爲
和新聲獨倚欄香夢可能畱玉笛芳魂早已落詩壇一
簾疎雨回春信數點輕煙籠曉寒索笑也知成往事祇
餘瘦影月中看

徐凝一條界破青山色坡公詆爲惡詩余嘗春日行山
中見碧峰屹嶺素練搖曳垂天直下劈分蒙茸七字真
道得出但落纖巧耳太白海風吹不斷江月照還空似
是秋景然匡廬距海數千里而猥云海風瀑布隔江十
數峰而必云江月倘固如高叟恐不免蚍蜉之撼也
學古人詩佳處驟不易得輒先沾染習氣譬諸畫工傳

神貌有邱壑者易肖也然使沾沾於一癡半瘖而神情
意氣迥非是人得不爲天下之賤工乎善學者遺貌取
神是一是二當於氣韻微參之

响嘍一字三音平音鉤樓上音莒旅去音句陋答簪之
簪平上一二讀伍員之員應劉之應枚乘之乘寧馨之寧
上番之番俱平去二讀詛祝之祝去入二讀鄮侯之鄮
去音贊平音蹇應劭音嗟唐詩俱作平聲拚字唐詩多
作判平去二聲柰字六朝人作那去聲者番者邊者字
去聲又司馬長卿長字非平聲相如相字非仄聲馬援
援字非平聲曹操操字非平聲陸務觀觀字去聲

唐人詩用字異音如劉夢得拋却承郎爭柰何爭作去聲停杯處分不須吹白樂天處分貧家殘活計分皆作去聲韓退之軒然大波起宇宙隘而防防音訪新輩只嘲評評音病王建每日臨行空挑戰羅虬不應琴裏挑文君挑皆上聲包佶曉漱瓊膏冰齒寒李義山簞冰將飄枕冰皆去聲段成式玳牛獨駕長檐車長作上聲白樂天請錢不早朝請作平聲四十著緋軍司馬司作入聲紅闌三百九十橋十讀如諶爲問長安月如何不相離相思必切燕姬酌蒲桃蒲作入聲三年隨例未量移量作平聲金屑琵琶槽琵琶仄聲仁風扇道路陰雨膏閩

閩扇平聲膏去聲得時方張王張王竝去聲元微之微俸封魚租封音奉一生長苦節三省詎行怪怪音乖洞照失明鑑鑑作平聲高屋無人風張幕張音漲苦思正旦酬白雪旦音丹雁思欲回賓自注思上聲陸魯望海客施明珠湘麩料淨食自注料平聲獨孤及徒言漢水纔容舸纔作去聲盧綸人主人臣是親家親作去聲李義山可惜前朝元菟郡菟作去聲九枝燈檠夜珠圓唐彥謙燈檠昏魚目檠俱音景徐鉉莫折紅芳樹但知盡意看注但平聲唐人如此尚多未能枚舉又宋陶穀尖簷帽子卑凡厮厮入聲陸游燒灰除菜蝗蝗仄聲拭盤

堆連展連上聲讀如輦東坡詩左元放放作平聲司馬相如如上聲

唐人詩句多攔入方言助語如杜甫劃見公子面劃見猶瞥見也遮莫鄰雞下五更遮莫猶儘教也赤憎輕薄遮人懷赤憎猶生憎也耐知茅齋絕低小耐知猶極知也飛騰無那故人何六朝人以柰爲那卽無奈也賀知章遮渠不道是吳兒遮渠猶從他也元稹取次梳頭闌淡妝取次猶次第也顧況市頭格是無人別格是猶已是也亦作隔是白居易萬戶垂楊裏君家阿那邊阿那猶何處也請君莫道等頭過等頭猶等閒也家釀唯殘

軟半瓶軟半猶小半也陸龜蒙可口是妖譌可口猶信口也羅隱可中用作鴛鴦被可中猶恰宐也鄭谷可合花前半日醒可合反詞也又如李白耐可乘明月作箇音書能斷絕杜甫長安若箇邊駱賓王箇時無數併妖姘箇裏無窮總可憐顧況箇身却似籠中鶴張籍爲箇朝章束此身白居易咄哉箇丈夫的有深耕處的無官職趁人來的應勝在白家時皮日休開時的定合雲液檜身渾箇矮石面得能頸貧養山禽能箇瘦韓愈乍可阻君意李端不忿朝來喜鵲聲趙嘏不憤遠年別杜甫不分桃花紅似錦杜牧贖冑新年歸否溫庭筠去帆不

安幅作底使西風司空圖剛須又樸越溪茶裏許原來
別有人又如酷見飽聞竭來端的好在其如寧可劣得
終然則是兼之因之憑仗也應劇憐借問暢有羌無之
類不可枚舉吾輩作詩熟俗者多用則涉打油生僻者
悞用則成笑柄如詞曲家襯字能手例以少爲貴也
裴說詩苦吟僧入定得句將成功撚髭人面目性情摹
繪欲絕

莊子支離叔與滑介叔觀於冥伯之邱俄而柳生其左
肘柳瘍也非楊柳之謂王右丞老將行昔時飛箭無全
目今日垂楊生左肘昔人已譏其誤矣嗣見元微之詩

乞我杯中松葉酒遮渠肘上柳枝生當時謬誤相承皆
讀書不求甚解之失也

陸游新蔬詩莫擬將軍春薺句兩京名價有誰知將軍
高力士也力士有薺菜詩然僻事須實用渾稱力士爲
將軍殊未了了此隨手徵引之病

世說顧長康哭桓宣武聲如震雷破山淚如傾河注海
形容盡致讀之令人失笑唐人詩今朝不用臨河別垂
淚千行便濯纓淚已不少至杜工部猶有淚成河經天
復東注視虎頭抑又甚矣此與太白白髮三千丈愁來
似箇長同一語意

邵星城詩云坐魚青草池塘外走菜黃蘆略約邊蛙曰
坐魚鱗曰走菜見南宋雜事又爾雅蛙在水者爲黽一
名土鴨亦古雅可用

三原孫豹人

枝蔚

游焦山中流遇風賦詩云風起中流浪

打船秦人失色海雲邊也知賦命原窮薄尚欲西歸太

華眠此與連江陳一齋

季事略

同一齋天崇間人嘗泛

大洋颶風驟起驚濤沸天舟礫礫欲碎人皆失色陳獨
從容作歌曰水亦陸乎舟亦屋乎與其歸於牖之下山
之窟乎何擇於江之中魚之腹乎人謂其雅量不減謝
太傅與孫興公戲海時余謂謝傅泛海之戲正不足多

風濤震猛生死呼吸閒而故作夷猶以僥倖萬一豈明
哲係身之謂乎

平陽崔氏有鶴巢於庭翼二卵主人竊以鷺蛋更之既
穀乳訝其不類其雄顧且噪怒搏其雌羣鶴紛飛作排
解狀雌悲鳴竟日摔其雛自挂樹死禽鳥之微有不憚
舍生以自白者異哉

詩家霸氣禪氣過者之病冷氣庸氣不及者之病杜韓
之沈雄惟沈故雄非霸也王孟之妙悟妙理入悟非禪
也韋柳蕭寥清而不寒無神味則冷淵明平和腴而不
枯無氣色則庸至於餽釘綺靡繁縟泛濫非膏肓痼疾

不足爲慮

前輩云作詩須有關係又云詩以有爲而作此說固然然風雲月露觸景抒情胷次閒何等自在必詞含諷刺事涉譏評論古則無與飢寒傷時尤大非體要至有憤懣牢騷不知自負爲何物者徒爲蘊藉人齒冷耳

甌北集中七律尤工佳句如黃天蕩懷古云歸師獨過當強寇兵氣能揚到婦人顧氏水榭云竹須問主看非易魚不畱賓樂可知入都依外舅劉午巖云我來客路誰青眼公在名場已白頭哭杭廷宣云久客不歸無異死故人入夢尚如生和海昌相國移居云循牆影裏人

三命廣厦胷中士萬閒酬袁子才云才名未冝將官換好句還應仗福消呈座主休寧汪公云杜門客少心如水謀國年深鬢有霜八月十六夜對月云佳節又看今歲去清光還似昨宵多送蔣心餘南歸云一俟猿臂原無分何物蛾眉敢不讒崖山云六更漫續庚申帝一旅難支甲子門傳文忠輓詞云我無私謁偏投契公不談文乃愛才桂平道中云遠嶺路高人似豆空江水落岸如山歲暮出都云重來似觸回心石欲去還同拗項橋劉可型下第云此客豈宜艱一第人生能得幾三年哭董東亭云并無福可消貧宦翻有身歸葬故鄉送沈卓

其云貫酒每爲無事飲稱詩相戒不平鳴輓賀舫菴云
命窮真比夏畦鬼身死未醒春夢婆此例不可枚舉大
率屬對必工措詞必雋筆無不達意無不新甌北真堪
比劔南也

金壇蔣衡字湘帆別號江南拙老以書法名於時維揚
富商某屬書十三經進呈時年已六十三矣合計字數
自揣須十年卒業慨然諾之卽靜掃一室濡烟腐毫小
不逮意輒復棄去竟如期告成得正副本各一少陵云
人生七十古來稀不有天幸其能葺事乎

納蘭成德侍中與顧梁汾交最密嘗填賀新涼詞爲梁

汾題照有云一日心期千劫在後身緣恐結他生裏然
諾重君須記梁汾答詞亦有託結來生休悔之語侍中
沒後梁汾旋亦歸里一夕夢侍中至曰文章知己念不
去懷泡影石光願尋息壤是夜其嗣君舉一子梁汾就
視之面目一如侍中知爲後身無疑也心竊喜甚彌月
後復夢侍中別去醒起急詢之已卒矣先是侍中有小
像畱梁汾處梁汾因隱寓其事題詩空方一時名流多
有和作像今存惠山草庵貫華閣

無錫高鵬翎飛嘗遊蜀中謁杜少陵祠堂見石刻小像

酷似其鄉先生浦前澗起龍因手搦以歸裝潢贈之前澗

乃懸之齋中大會賓客飲酒賦詩遂傳前澗為少陵後
身前澗於書無所不讀而尤嗜杜詩著有讀杜心解行
世晚歲解組歸田藝花種竹挈杖行吟其風致殆不減
少陵之居瀼東西也後身之說或信然歟

無錫嚴中允蓀友繩家藏趙子昂楷書麗人行墨蹟攜

至都下為某大僚強持而去嚴索之急某曰此固可珍

酬君者當亦非細時聞鴻博科特送嚴應舉緣是獲雋

近邵宗藩大年讀書開利寺見牆角字紙阜積屋漏鼠嚙

力勸僧焚之僧欲畱以拭棹與之桑白紙百墮始允邵

手自檢拾焚及半中有渲青宋牋泥金小楷書藏經數

十頁款識翰林院承旨趙孟頫奉勅書因去其黜腐集
為金剛經一卷唐詩若干首後為盧運使雅雨貝千金

購去
康熙甲午南闈榜前宐興某請仙問何人得中乩云徐
充文時充文已下世矣不解所謂及榜發得徐炳文儲

大文郁文三人名姓俱驗而二儲一字六雅一字允弢

充字尤巧合又某科會試場前問四書第一題乩云中

人以上章問次題又云中人以上章問三題亦如之後

首題知之者一節次則故天之生物必因其材而篤焉

見中人外註三則五穀者一節見知之者外註亦奇

亦見貞淡

旅店壁間多有閨人題句率皆文士贗託如吳漢槎詭
名金陵女子王倩娘之類詩格一望可知近見武林客
舍題壁云深閨羅素不禁秋扶病來尋古寺遊看到紅
葉縹渺處又添新恨上扁舟一望孤帆入遠天柔腸空
斷白雲邊湘波有盡情無盡兩地相思載滿船庚子八
月五日山陰女士題詢之主人的係弱腕惜不知其名
連江陳東山坦與其弟址竝有詩名嘗合刻春草集而
存者寥寥拜東坡先生廟云低頭下拜東坡像展眼頻
看北斗杓不厭瘴鄉生白髮獨憐天下哭青苗聞雲野
外橫孤鶴明月舟前憶洞簫幾度登臨重懷古天風吹

斷海門潮五言如古木支殘照寒鴉帶遠吟漢水舟移
月巴山路入雲俱可傳

長白納蘭峻德字克明詩格遙秀絕類晚唐趙北口云
西風垂柳復垂楊斷盡南來客子腸却更長堤三十里
亂荷殘水雁聲涼銅雀臺云三臺羅綺土花凝舞袖香
消黯漆燈翠輦不來環佩冷夜深紅鬼哭西陵感舊云
玉臺詩寫蜜香箋鬢影春生杏葉烟馬首一枝紅照眼
傷心事往十三年

漢陽彭上舍念堂湘詩極有格調遊塞外詩尤多高作
過懷來云日還停水上山已墮雲中雞鳴驛云風聲連

大漠雪意釀深秋將抵宣府大風云寒風吹野黑磧石
照人黃俱非凡響

桐城方南堂

貞觀

詩格清拔五言如人喧江市午木落水

村秋月出江花落詩成海月圓七言如細雨白楊人上
塚冷烟孤棹客思家秋雨似關多病客夜蟲偏語別家
人俱得中唐三昧

荆溪任澹存

會貽

雅善填詞詩亦閒作其雜憶詩云折得

寒香雪一枝小窗催賦早春詩記來院落燒燈夜親爲
如花插髻時風致絕佳

古人名句有天然入妙者其不可湊泊處正在一氣脫

口近錢塘金壽門

農

咏苔句云細雨連三月無人又一

年頗得三昧

少陵云別裁偽體親風雅真偽之辨介乎毫芒非深識
者未易辨別京師黑窰廠壁閒有題句云斜陽千古色

芳草一春情過客多賞之史蒙溪

承豫

曰此江湖贗體詩

也余以舉似于午晴

枋

先生亟嘆爲知言

楊谷簾

廷琮

居邑之娑羅里擁書萬卷以詩酒自豪年三

十餘就二尹職旣而悔之遂告歸未幾羸疾卒嘗贈余

北行云折柳贈行客臨江發暮愁柳搖春雨暗江漲水
雲流良友此離別新詩誰唱酬願爲今夜月遙送爾行

舟吉光片羽亦見故人風致也

歛縣程魚門

晉芳

同年僑居維揚家故業嵯慳爽揮霍蕩

廢殆盡乾隆壬午以

召試授中書舍人辛卯成進士

改授銓曹旋由四庫館纂修入翰林博雅工詩文尤邃

經學海內知名士投紵款謁卽倒屣如平生歡其書齋

榜聯云翰林風月三千首吏部文章五百年成語恰合

甲午夏贈余之官德清詩云一遇大梁春同聽長安雪

麥風生夏涼送子去西浙浙水碧沈沈蒼嵯叫古禽使

君停櫂處微雨淡花陰花落茗溪清花開雪溪綠時聞

打稻歌亦和採蓮曲爲問官大梁何如官浙水江湖久

相忘游宦信行止我有探奇興他時解綬歸莫驚山賊

至戒吏示兵威古雅蕭澹絕似梅聖俞姜白石一輩人

羅江李羹堂

調元

觀察詩才敏瞻著有聽秋樓詩集縱橫

跌宕見賞於錢香樹尚書余隨牒德清祖席口占云四

月含桃熟依依悵別筵江南蓴菜長燕北柳條牽舊仰

飛鳧舄新投飲馬錢縣名真不忝清德有誰先率爾應

酬亦可略識梗槩矣

南匯吳學士白華

省欽

學有根柢兼擅詩筆嘗贈余詩云

十年山水縣人唱使君詩清氣大來後風流無盡時樵

薪幽徑墮漁網夕陽支安得凌風翰超遙與子期標格

冲淡漁網句有聲畫也

石門蔡侍御梵珠

履元

書法負盛名詩不多作余都門旅

邸頗擅烟水之勝諸同人賦秋興詩蔡亦和云暑退涼

生籟風來樹有聲時惟秋最爽人得氣之清朗抱開佳

境孤吟破宦情祇應寥廓外鸞鶴與同賡詩不以鍛鍊

為工亦自合格

寶應王松巖

高樓村

先生曾孫樓村以康熙癸未及第

而松巖亦以乾隆癸未成進士官漢陽令詩有家法戊

戌秋寓於京師出藉山閣圖卷索題即次韻贈余云佳

人碧雲外好句逸難求跌坐一卷石孤吟三徑秋清風

起遙籟遠性對閒鷗可憶尊鱸美烟波有釣舟

己亥夏余隨牒將之連江都門諸同譜贈詩歸安戴工

部蕨塘

瑤

云鼇江近對海雲深雅韻仍攜鶴共琴手擘

輕紅開荔社身依濃綠坐榕陰徐陵自理珊瑚架韓愈

惟栽松桂林料得政成稀吏牘石闌點筆只長吟時烏

程費侍御道峰

南英

贈作亦推壇場

兒子

荀業

自滇南歸見其篋中贈行一詩云交情初獻紵

又賦柳條青塞雁人同去寒窗雨獨聽春應江上見帆

到海門停遙識趨庭暇焚香譜鶴經風致頗近唐人詢

為昆明布衣錢雲咫

允湘

所作錢擅繪事兼工隸書

釋妙復字天鈞無錫人與榮道士洞泉杜太史雲川結
詩社稱九龍三逸余嘗過石林精舍投詩云修修釋子
遠窈窈煙霞深停策一相訪松花滿院陰泉流澹吾慮
鳥語窺禪心趺坐不知晚微聞清梵音時余方廿齡天
鈞則鶴髮皤然翩躚杖履猶哦詩撫帖好學不倦談次
徵雅故令人意移卒時年九十餘矣

郡東郊紅梅閣邱仙故蹟幽軒數楹有洞庭道士流寓
自言年百二十矣紳士物色之問訊及余謂與余有舊
余邈不記爲誰何人急往訪之已先二日去因題其壁
云跨鶴飛鳧兩未逢昔年何處遇仙蹤梅花落盡白雲

去悵望莫釐天外峯

舍弟承宋

大祁

工制舉業尤耽作詩文以不戒於酒年二

十七病瘵卒著述甚富臨終悉焚之曰母傷吾父母心
也記其山中晚歸一聯云遠燒穿林滅孤筇傍鳥還亦
自雋致

押險韻正以平穩壇場然皆不免拾牙後慧往歲楊月
航仁招飲同人賦凸字韻詩管松崖云余雖不飲亦酒
人貪看激灩杯心凸余云曲終洗盞更斟酌月漾酒波
觥底凸詩成相視而笑余曰此無妨前人已疊見矣少
陵詩雲鬢心凸知難捧自是創語杜牧詩酒凸觥心激

灩光陳陶詩醪凸蠻觥奉君壽王惲詩酒凸金杯飲興
寬東坡詩酒凸光照牖又十分激灩金尊凸范石湖詩
但嫌酒淺金杯凸遣用雷同視各人鍊句法耳

史記項羽本紀贊舜目重瞳子項羽亦重瞳子舜羽不
倫借周生言引起補敘羽異表耳雜記舜目重瞳上下
生項羽重瞳左右生不知何據然古來重瞳多矣顏回
重瞳見劉子王莽重瞳見後漢書魚俱羅重瞳見北史
呂光重瞳見涼州記沈約左目重瞳見梁書李後主煜
一目重瞳見南唐書東漢劉旻重瞳梁康王友孜重瞳
見五代史明玉珍重瞳見宏簡錄又眉山重瞳老人授

張遠霄即張仙度世法見眉州志廬山歸宗寺智常禪師

重瞳見傳燈錄建州老僧卓崑明重瞳見養牖閒評會
稽金煜一日重瞳見曠園雜誌至荀子堯舜三眸子註
三眸子重瞳也則似堯亦重瞳春秋孔演圖蒼頡四目
韻府作四瞳則似蒼頡亦重瞳劉孝標文有云八彩光
眉四瞳麗日四瞳之即重瞳此其證矣

蕭山毛西河奇齡太史榜伍子胥廟額云春秋士大人多

不解按公羊傳伍子胥父誅乎楚挾弓而去楚以干闔
廬闔廬曰士之甚勇之甚毅梁傳伍子胥父誅於楚也
挾弓扶矢而干闔廬闔廬曰大之甚勇之甚西河本此

閩人飲酒方言爲嚼酒歐陽文忠公贈趙康靖公概詩云公能不遠來千里我病猶堪嚼一鍾朱子和彥先歸省詩云上堂佳慶從容問一嚼何妨累十觴或疑用閩中方言如顧況詩困別郎罷心摧血下之類非也按說苑魏文侯與大夫飲酒使公乘不仁爲觴政曰飲不嚼者浮以太白又後漢五行志嚼復嚼者京都飲酒相強之詞也二公詩本此至閩人飲食槩謂之嚼正韻嚼在笑切同噍王充論衡口齒以噍物荀子榮辱篇咩咩而噍鄉鄉而飽前漢高帝紀襄城無噍類註無復有活而噍食者也則方言亦有本矣

朱幼芝海東札記云每夜分籟寂忽四壁作響啾啾如鵲噪火之則蜥蜴鳴也聒耳不休殊無清趣徒令旅懷作惡耳按蜥蜴見於周禮說文知不獨海東爲然莆田林舍人玉巖巖琉球竹枝詞云匹練明河牛斗橫蓼蓼衙鼓欲三更思鄉坐擁黃紬被靜聽盤窗蜥蜴聲自註蜥蜴能鳴聲如麻雀玉巖閩人豈亦驚爲創見耶

域中名勝因名人題咏附會得名者多矣曩歲余偕于文襄公入天台山桃花洞口一溪瑩然山人曰此惆悵溪也圖經所無蓋因曹唐惆悵溪頭從此別碧山明月照蒼苔而得名者余爲題詩云寒溪一帶碧灣環惆悵

劉郎去不還曾照仙姿臨水上更浮花片出人閒閒雲
寂寞歸深洞翠竹淒清冷舊山猶有別愁流未盡夜深
明月照潺潺文襄公笑曰溪名附會子更實之以詩他
日有好事者當採入天台志矣

賈島先爲長江主簿後遷普州司倉參軍今人但稱爲
賈長江而已其墓有三一在安岳縣一在房山縣一在
當塗縣安岳在唐時爲普州卒或葬此吾邑趙豹三
先生考訂最精其賈島墓詩云空山唵骨兩嶙峋遺墓
塵封不計春明月長江依舊在祇今誰是祭詩人似賈
島墓應在長江也長江今蓬溪縣屬

歸安孫羨門

霖

赤嵌竹枝詞云庶魚庶草劇難名每訝

寒宵壁虎鳴一種綠毛幺鳳好也誇文采滿東瀛自註
倒掛鳥似鸚武而小翎羽鮮明紅衿綠衣緣樹循繞鉤
嘴短足爪纖而長性喜倒掛夜睡亦然卽東坡所謂倒
掛綠毛幺鳳也余按綠毛幺鳳東坡自指蜀產言之安
知不似是而非遽云卽東坡所謂耶卽今東瀛亦遍覓
此鳥不得甚矣文人之誇也

湖州書賈攜宋槧論語半部無註旁批小楷類歐陽率
更頗多別解如晏平仲善與人交久而敬之謂平仲善
交故人久敬君子周急不繼富謂當時諺語以能問於

不能五句謂聖學科條卷首印章二朱文覺軒手澤白
文治平進士按治平宋英宗年號則此本在集註未出
以前

凡同姓不宗者必書姓以別之宋元人集中都如此漁
洋文集多稱宗人某及觀先生年譜載丙戌二月三男
婦王氏卒或以娶同姓疑之余引吳志伊任語云王沈
與王基聯姻劉疇與劉嘏爲婚世人無譏緣非同原也
疑始釋按王氏郡望有瑯琊太原黎陽宋避太祖諱改
匡爲王郡望晉陽混稱宗人亦非

陳其年四六皖江程叔才師注板行已久顧中多紕繆

卽如銅雀瓦賦云雖有彈棊愛子傅粉佳兒叔才但引
藝經注彈棊引陸機弔魏武文序今以愛子託人注愛
子又引魏志何晏事注傅粉佳兒援據俱錯余按世說
巧藝篇文帝於彈棊特妙用手巾拂之無不中又魏略
邯鄲淳博學有才太祖遣詣植時天暑熱植呼常從取
水自澡訖傅粉遂科頭拍袒胡舞五椎鍛跳丸擊劍誦
俳優小說數千言訖謂淳曰邯鄲生何如耶然則彈棊
固指魏文傅粉乃謂子建也迦陵用意極切而叔才乃
以藝經等書證之殊失本旨

論語註左邱明古之聞人自漢以來諸儒論說不同或

以爲一人或以爲兩人或以爲三人迄無定見至朱錫鬯氏謂孔子旣卒周人以諱事神名終將諱之爲弟子者自當諱師之名此第稱左氏傳而不書左邱也此固深於禮者之言然吾未聞諱師名而不書弟子之姓者也其然豈其然乎

詩之子于歸宜其家人註婦人謂嫁曰歸世遂以嫁爲子歸然戴媯大歸莊姜亦曰之子于歸矣歸寧父母世謂專指女子而言然錢起詩才子欲歸寧棠花已含笑李商隱詩羲之當妙選孝若近歸寧趙湘亦有送周湜下第歸寧序又韋昭云古者名男子爲丈夫尊父姬爲

丈人漢書宣元六王傳所云丈人謂淮陽憲王外王母卽張博母也則女子亦得稱丈人焦仲卿妻詩三日斷五匹大人故嫌遲宋本大作丈

涑水紀聞云太祖將北征京師喧言出軍之日當立檢點爲天子太祖懼密以告家人太祖姊面如鐵色方在廚引麪杖逐太祖擊之曰丈夫臨大事可否當自決胷懷乃來家聞恐怖婦女何爲耶太祖默然而出余按宋史太祖有姊一人未筭而天建隆三年追封陳國長公主則引杖逐太祖者何人耶王衍粹云或卽魏國長公主考魏國長公主太祖女更無引杖擊父之理當爲太

祖妹秦國長公主涑水所紀不無傳訛

長洲吳拙菴成儀全唐詩鈔凡例云宋明人詩前或誤採

茲悉訂刪至五代時人如徐鉉胡宿等多歸宋後作亦
竝鈔入又云全書有一詩而互見各家者茲悉考正余
按胡宿字武平晉陵人天聖二年進士歷事仁英二宗
以太子少師致仕謚文恭宋史本傳可考公登第距五
代已六十五年迄致仕又四十三年安得謂五代人歸
宋耶又杜常昭憲皇后族孫神宗朝登第歷官工部尚
書所傳華清宮詩全篇誤採而茲仍以爲唐末人鈔入
又五十九卷劉阜長門怨宮殿沈沈一首與六十卷李

紳長門怨同則亦未能考正也

元時二名重文者脫脫嚶嚶之外又有牙牙回回牙牙
康里人以子脫脫顯回回字子淵與弟嚶嚶齊名功臣
則有土土哈闊闊不花係屬則有闊闊出徹徹禿孝行
則有徹徹担公主則有巴巴哈兒闊闊倫魯魯罕安安
輝殊難悉數考遼金二史似此命名者甚希

陽湖徐樸弦鼎丙戌進士官於蜀有聲詩不多作壬申

仲夏送子再適楚中卽席賦詩云暮虹東斲楚天秋千
古湘江恨未收別浦縱多憑弔處傷情知在仲宣樓亦

楚楚有致

脈望蠹名見西陽雜俎鞠通琴蟲見娜嬛記韻藻集作
對語大興朱少宗伯石君珪贈予句云觀心似水鯢桓
審養器如琴脈望調悞以脈望屬琴蓋才人捉筆時偶
不檢耳

合肥龔芝麓鼎牢籠才士多有權術嘗女死設醮慈仁
寺一士人寓居僧寮僧倩作輓對集梵筴二語曰既作
女子身而無壽者相龔詢知作者卽竝載歸面試之時
春聯盈几且作且書至溷廁一聯云吟詩自昔稱三上
作賦於中可十年乃大咨賞許爲進取計久之以母老
辭歸瀕行龔贈一匣竊意爲行李資發之則士人家書

具云某年月日收銀若干蓋密遣人常常餽遺無內顧
憂久矣乃頓首謝依倚如初卒亦成其名

嶠峨周廷尉立崖於禮偕諸名士小飲屏閒有畫碧桃白

頭翁一幅爲題賦詩眾苦綴合不易立崖先成落句云
蟠根合有三千歲青鳥飛來也白頭座客嘆服

程荆南夢居丹徒臭水溝合清泉時張蘭田鏞戲云官

做清泉縣家居臭水溝時稱雅諢

有客語余曩在柳州一夕山水驟發魚盡死今來臺灣
颶風作鳥亦死夫魚固水族鳥能御風而死之者何也
譬諸不時其令而中以法也玉溪生魚鳥猶疑畏簡書

富哉言乎

春光明媚同人集宴賦詩俄以公事敗興口占云渭城
曾唱愧黃塵雨立仍慚陞楯郎豈有羲之觴上巳却如
邠老咏重陽當關羽檄催輸餉橫海樓船待發倉巧手
莫爲無麪餅后山句醉侯那更覓真鄉遂罷酒

陳一齋云童子之相聚也詈而後已僕夫之相戲也鬪
而後已學者之論道也爭而後已故爭則失所爲論之
本矣余按連江縣志一齋與董少司農龍塘應舉友善而
議論不相下號爲罵友董嘗有詩云平生好爭論好友
輒相罵及其疾病時皇皇憂日夜如割一半身如屋崩

其瓦百物皆可求好友難再假久交如薰蘭乍交如佩
麝麝性豈不烈終不如蘭化吁嗟陳一齋使我食不暇
及卒其祭文云遍交字內無兩一齋自信生平無兩罵
友今罵不可得聞矣人之云亾如割我體一齋知爭則
失所爲論之本而顧躬自蹈之耶吾友汪澤周溥好論
古而必爭一先達延爲子師以爭辯不已遂去館固知
文人結習未易化也

吳人有航海至朝鮮國者譯不盡曉以箋素通紙墨精
良書法亦大類董文敏錄之以諭憲事札云初來獲覩
盛範足使海外管見聳慰方言有殊雖不得壘壘承話

筆墨淋漓亦能照人肝肺感仰已俄聞二位尊侯一
齋穩頓否第想行中所供饌羞多乖於嗜好鄙國陬陋
或蒙容恕耶謹以生豬一頭魚卵一升蝦卵小許汗呈
蝦卵醢是弊邦所產中自珍者謂以味人四海同然故
意其宐口而敢此覓伴如其可於所嘗則亦當更求繼
給於二位可更俯示也俄話閒有未盡者復此複煩貴
船待秋風節舉帆固已聞命矣來月十四前後則港口
潮水尤盛大隻船未易運動故欲趕潮盛時以來初三
四日內移繫外洋候風至其果然否幸望示破爲申報
上司之便如何蓋弊邦于貴船進退動靜一皆具啓於

國王故敢此瀆聽恭惟崇亮不宣謹侯帖己亥七月廿
五日朝鮮國臨瀛宰兼署萬頃縣曹允亨頓首

雍正戊申春先君夢一人儒衣袞博奚童負笈後隨曰
吾吳郡都元敬也欲覓一讀書處因款畱之翌日余生
先君常舉以相勸弱冠時作雜咏詩有云武成止取二
三策文選還收百一篇逸少蘭亭頗高作那憑碑版與
流傳先君曰汝亦知昭明不錄蘭亭以爲憾耶又嘗咏
鴉云飛近馬頭晴雪處立殘牛背夕陽時謂頗得詩意
勉之迄今老大無成孤負庭訓而又牽於世網不能如
少卿之忍饑誦經良可愧也

炙硯瑣談卷下

先外舅湯緯堂先生著炙硯瑣談十二卷又補遺一卷
值臺匪竊發遂燬于火攜拾殘本未及十之四也趙君
味辛與先生爲石交不忍是書之湮謂鼎中一鱗亦可
知味更訂定三卷以剞劂之資屬歙縣鮑以文氏刻之
知不足齋叢書中擬開雕矣適鮑氏有鬱攸之災遂不
果趙君復攜以歸曰終當有以報吾死友也今春仍付
諸梓以廣其傳嗚虜斯孝標所謂賢達之素交乃于今
遇之矣猶憶壬寅歲先生于役甘肅反過里門一日飲
余于西齋酒酣商瑣談中十數則至漏已四下忽命家
僮以巨觥至引滿酌余日畢之吾此行海外蓬漂梗泛

未知所泊故園尊酒之歡其可得乎不怡者良久時先生已檄調鳳山矣及將發之日復慨然曰吾年甫弱冠卽衣食于奔走三十年來出門入門了不爲意獨此數日間周視堂廡觸物關心若皆有不能釋者往歲扶鸞有鳳皇山下好安身句今殊怛怛人生奄忽都無可戀他日但得以一卷書傳後足矣嗟乎孰知竟成語讖而事且變幻若此耶先生凜然就義大節褒揚已可無憾而殘編斷帙終藉故人之力不至就湮所謂得一卷書以傳後者固先生之素志而冥冥中感此良友又當何如耶是爲跋甥莊宇達謹識

碑

天津市古籍音
書名 碑碣瑣錄 (附)
編號 4907
冊數 1 售價